

Cormã Ampo Te Jũ Mãn Xà Ata Te

JOWĀW MÃ AMJI TO IPIPĒ XÀ

Jarĕn Xà

Yhỹ, pĕ Jowāw ihkàhhôc ita to, ne krĩ te xet kam Jeju na mehkwȳ atajê cunea mãihkujate. Ne pĕ cupê Jeju jarkwa na membrar catêjê nō. Ne pĕ mam cupê tep pro catê, pĕ Jeju ihkôt ipa catê na ahna ahwỳ. Pĕ caku crê kam Jeju kôt ipa, ne pĕ Jeju te amji kam hapac xà cunea na hōmpu. Ne ramãihwej tu kam ri cute Jeju na mehkwȳ mã ihkàhhôc ita hôc, ne ihkujahêc.

Ne pom cu me ihkàhhôc cahyt ita kam ri, cute me cumã, cute me Jeju te amji kam hapac xà jicuna, me cumã cawpa, mãr quê nee me hīcu nare. Ne cute Jeju to amji mã mehhimpej cwỳrjapê ri, mehkwȳa te me amji pupun xà kêanre na me to, mã me amji pupun to kêanre. Cwỳrjapê ri ahna me cumã apô. Ne me cumã pjê ita jamre xà kam, ampo cunea te me hỹrmã cator xà ata jarĕn. Ne mecumã Pahpãm te pjê ita cunea to hamre, ne intuw ton na cute me cumã harĕn. Ne Jeju te me cumã ampo itajê cunea to hahkre, mã harkwa kôt cute me cumã harĕn par. Na ri hō kàhhôc ita japrȳ te **Cormã Ampo Te Jũ Mãn Xà Ata Te Jowāw Mã Amji To Ipipĕ Xà Jô Kàhhôc (Ipipĕ Xà)**.

Jowāw te amji jarĕn xà

Ipipĕn Xà 22.6-7

1 ¹Yhỹ, ihkàhhôc ita cahyt xà te hajỹr he. Ipê Jowāw, ne pa wa ha me amãihkàhhôc ita hôc. Pĕ mam, ramã rỳ pĕa mã, Pahpãm Jeju mã ampo tehajỹr xà itajê cunea jarĕn pa. Mã Jeju te me cumã hàpĕn catêjê mã ampo itajê jarĕn xà na, imã cumã imprar catê kujahêc, cōjkwa pĩn. Mã iwrỳc, ne iwỳr cator ne cute imã ampo itajê cunea jarĕn, neimã hahkre par. Cwỳrjapê wa ha ihkàhhôcita kam, me amã ampo itajê cunea jarĕ. Ne ampo te hajỹr xà itajê, quê ha nee amji to hàhtũm ry nare.

²Ÿhỹ, pê Pahpãm, ihkrapê Jeju mã ampo itajê cunea jarẽ, pê Jeju harkwana imprar catê mã harẽ, pê ma ajpên imã harẽ, na wa ha ihkàhhôc ita kam ihcunea na me amã ihhôc partu. Ne quêt Pahpãm cakôc xà ita ampeaj kam ri. ³Na ca ha ate me ihkàhhôc ita cahyt, ne kam me gapac na, ca ha ampeaj kam me gakry. Ne por quê ha me kampa ne me hahkre pej atajê, quê ha hanea ne amehakry. Hõ, por quê ha ampeajkam me Pahpãm jarkwa itajê kam, me hapac pejtijatajê, quê ha ihtýtj me hakry. He, quê ha nee ampo te hajýr xà itajê amji to hàhtúm ry nare, na quê ha me hakry.

⁴Ÿhỹ, ipê Jowãw, wa me apê Jeju na mehkwỹ jakrã te xet, ne Axij jô pjê kam me akrĩ atajê mã, wa ite ihkàhhôc itajê ton. Ne me amã Pahpãm me, ihkra Jeju Crixto mã me icakôc, ne cumã me acajrên to:

— Me to impeaj ne, ne me caxwãm pê me cumã acarĩcti gõ — hane. Ne Pahpãm ita pê rý pêa mã Pahpãm ata, ne cormã cupê Pahpãm rohnýtti mã, ne cõjkwa kam Pahhiti krĩ xà ata kam ihkrĩ. Ne cahê na Pahpãm CarõPejti caca xà te xet atajê mehkrĩ. ⁵Pê pjê ita kam Jeju te apu ipa reriamã, ampeaj kam Pahpãm jarkwa atajê to ajco ihcakôc to ipa. Ne cupêa ri Pahpãm mehcãmter, ne pyxitpeaj ne hacpýa mã ihtír cakõnĩ to ihtír, ne taamã ri pyxit peaj ne cupê pjê kam pahhi catêjê cunea jô Pahhiti. Ne cumã me pahkĩn, cwýrjapê pety ne caprô jaxwý. Ne caprô jaxwýr ata to me pahkên kêanre atajê cunea cuhhôn partu. ⁶Ne cute me pahcunea to Hũm mã hàpên catêjê na. Na cu ha me harkwa kampa, ne pjê kam mehkrĩ itajê mã me harẽ. Ne hacpýa mã Pahpãm wýr, pjê kam mehkrĩ itajê cajrên xà atajê to, cu ha me cumã, pjê kam mehcunea to me pahhimpej. Pê Jeju Crixto me pamã ampo pejti itajê cunea ton pa. Cwýrjapê ri mehcunea te hahkre pej na imã me to prãm, nãmri Jeju ri quêt mehcunea jirõa pê carôt týj rohnýtti mã! Ne ahnaa ri imã to prãm!

⁷Ne me hõmpu he, ramã pjê wýr ahcakrã kam iwryc xaa kam he! Quê ha mehcunea me hõmpu, quê ha hanea ne cute ame caxwýr catêjê ihtýtj amehõmpu. Ne por pê pjê kam mehcunea amehcaca atajê, quê ha Jeju te amji jaxàr na me hõmpu, ne ampeaj kam me cumã hũpa. Quê ha hũpate ame amrãa to ameamrã. Ne quêt imã Jeju te hacpýa ne amji jaxàr ita na ri ampeaj kam imã to prãm. ⁸Ne me hirõa pê Pahpãm pê Pahhiti carôt týjti ata te amji jarên to:

— Ipê pjê kat me hihôt jô Pahhiti, ne ipê cumã kat kam ampo cunea jô Pahhiti, ne ipê hicu xaa kam ampo itajê cunea jô Pahhiti — hajýr. Ÿhỹ, Pahpãm pê rý pêa mã Pahpãm ata, ne cormã cupê Pahpãm rohnýtti mã.

⁹Ÿhỹ, ipê me akrã tũm pê Jowãw, ne ipê, por ca Axij jô pjê kam Jeju kôt me amji pupun xà kêanre to me amji pupu atajê, tõ kaa wa. Ne cu ha pahcuneaJeju cwýrjapê ame amji pupun xà kêanre to me papa, ne pom cu me pahcunea ame amji pupun kêanre itajê mã, cu ha me pahcunea pahtýtj me awcanã to mehtýaj ne, neme pahcunea Jeju kôt amji to me

pahhi. Pê Jeju Jowāw mā amji to ipipĚ Pê wa ajco pjĚ cunea kam Pahpām jarkwa jarĕn to ipa, por pê Jeju imā to hahkre ne imā huwahi ata, pê wa ajco harĕn to ipa. CwÿrjapĚ pê me ipro ne ma cō jipōc ri, pjĚ japyrĚ te Patmo jŏ pjĚ ita wÿr me ikujate. wa ita ri apu ipa, ne jŭ caxuw icatorxà hamreare.

¹⁰Ne pê wa me pahkôt xà jŏ amcro pê tōmĭc na jÿ ne Pahpām to amji kampa. Pê Pahpām Carō Pejti imā amji gō. Pê wa pea amji caquĕc kôt jŭm jōkreĭ, pê ihhĕj rŭm hōhhi jōkre krāhhi tÿjti ata kampa. Pê imā harkwa to:

¹¹— Wa ha amā ampo jàhtōa ne to ajpĚ, ca ha hōmpu ne atÿj ahna ihhōc partu. Ne ma krĭ te xet kam Jeju na mehkwȳ atajĚ mā ihkujahĕcpa. Ne por krĭ atajĚ japyrĚ te ri Epet jŏ krĭ me, Pĭhhōcuxwa jŏ krĭ me, Hawĕnti jŏ krĭ me, Tijat jŏ krĭ me, Pyt jŏ krĭ me, Ihkjĕ kĭn jŏ krĭ me, Ratixa jŏ krĭ atajĚ wÿr ca ha ihkujahĕc partu — hane.

¹²Wa ite jŭm ita pupun prānte hÿrmā ipipkjĕr, ne ite wakÿre prà tepti pê ôr te ihpōc xà mā cuhhĕ xà te xet atajĚ pit pupun. ¹³Mā hipōc ri jŭm pê me Pahhàkà Cati pyrācti ata ihkà japyĕhti ata kam xa. Ne wakÿre prà tepti pê ôr te ihcahti na hĕ mā to xa. ¹⁴Ne ihkĭ jaka ita pê ihhĕj rŭm kĕn pojre jaka, ne into jarwrȳ ita pê ihhĕj rŭm cuhy pōc jarwrȳ. ¹⁵Ne ihpar prà ita pê ihhĕj rŭm me hŭhhi na hĕ xàcrecerti ata prà pyrāac. Ne hōkre par ita pê ihhĕj rŭm cōhxocti jàhkrihkrit par. ¹⁶Ne pê awpōc rŭm, hŭhkra ata to caxĕre te xet ata cwa ne to xa. Mā harkwa pĭn wapo xwahhihti xwapeaj te hŭjĕ ata cator. Ne ihkuc prà pê ihhĕj rŭm pyt te me pahkrā jimoac kam ihkrĭ prà pyrācti.

¹⁷Wa ite hōmpun, ne pea hŭpa te ipĚ mehtyc pyrāc, ne cuna mā ijŏ pōrpo ne nō. Mā cute ina awpōc rŭm hŭhkra xir ne imā:

— Nee apu icupa nare. IpĚ cumā kaat kam ampo cunea jŏ Pahhiti, ne ipĚ hĭcu xàa kam ampo atajĚ cunea jŏ Pahhiti. ¹⁸Ne pê wa ty, ne me ipupu he, wa hacpÿa mā itĭr, ne ita caxuw jŭ caxuw ityc xà nare, ne ipĕa ri mehtyc xà jŏ Pahhiti, ne hanea ne ipĕari mehtyc catĕjĕ jŏ Pahhiti.

¹⁹— Na ca ha ate ampo te hajÿr xà atajĚ pupun xàa na, ahna ihhōc. Ne hanea ne cormā ampo te jŭ mǎn xà atajĚ na ihhōc. ²⁰Ne hamre, wa ha amā ijŭhkra kam caxĕre te xet atajĚ me, ihpōc xà te xet atajĚ cuhhĕ xà itajĚ kôt harĕ, ca ha kampa. Pom ihpōc xà cuhhĕ xà te xetitajĚ pê me ikwȳ jakrā te xet atajĚ pyrāac. Ne caxĕre te xet itajĚ pê ihhĕj rŭm cōjkwa pĭn imā me hāpĕn catĕjĕ te xet atajĚ pyrāac, quĕ ha ihtÿj ahpÿanre na me ikwȳ jakrā te xet atajĚ jamā — hajÿr. Hōhō, cute imā hŭjarĕn to hajÿr.

Epet jŏ krĭ kam mehkwȳ jakrā mā kyre pê Pahpām kĭn

2 ¹Ne jŭm ata te imā harkwa hyr to hajÿr he:
— Ÿhÿ Jowāw, ita caxuw ca ha Epet jŏ krĭ kam, por ikrac ri me ikwȳ jamār catĕata mā ijarkwa kôt, ihkàhhōc ton to hane he: “IpĚ jŭm

te hũhkra to caxêre te xet ne incwÿr ne to xa ata, ne ipê, por jũm ôr te wakÿre te ihpôc xà cuhhê xà cajpuw apu mō ata. Ne ijarkwakôt ri me amã ihkàhhôc ita. ²Ne imã ate me ampo ton xà atajê cunea na me gahkre pej. Ne ate amji mã me aprĩa kam, ramã me gâpên xà ton to me catia. Ne imã ate nee mehkêanre atajê mã me gũcanâr nare na me gahkre pej. Ne ma cute me amãInxũ jarkwa to mehcahôc catêjê na me amji jarên atajê cajpê, ne me hahkre pej. Quê ha cute ame amã ihhêj xia jarên na, ca ha me hahkre pejpyrentu, ne ma amempar caca, ne ma ame curê. ³Ne icwÿrjapêa ca ate amji mã me aprĩa kam, ame amji pupun xà kêanre to ame amji pupun. Ne ate me amji pupun xà kêanre atajê mã atÿj meawcanã, ne imã ampo itajê cunea na me apej pit.

⁴“Ne por ampo pyxit peaj ata na ri imã me ana prãm nare he. Nee mã ampo nare, pê ca mam ampeaj kam me amã ikĩn, ne ita kam mã ajte kyre pême amã ikĩn, mam kĩnte. ⁵Xà ca gôtpê ajkĩ mam me amã ikĩnti ata tome amji japackre? Ca ha ate me to amji japackre na, ca ha hacpÿa mã iwÿr me apkjê, ne ikĩnti ata to ame ikĩn. Nãmri, ca ha ate me akên jicu nare, nenee iwÿr me apipkjêr nare na, wa ha hacpÿ ne amji jaxà, ne itÿj me apê gô pôc xà cuhhê xà ata capa, quê ha hãm xà kam caprÿ. ⁶Ne por ca ramã ame ampo pyxit ton to me apa ata na ri, imã ihprãm to prãm. Nee mã ampo nare, ca ramã ma ame Nicoraw kôt me ipa catêjê hêj xia to amehcâcâcatajê par caca, ne me apê ipyrâac, nema ame curê. Nãmri wa ma ame curê.

⁷“ÿhÿ me ikwÿ, xà ajkĩ me gapac nare, me gũpar xà caxuw? Hãpà. Ihtÿj me akam me gapac, na ca ha me Apãm Carô Pejti te mehkwÿ jakrã mã harên xà na me kampa, ne mempartu. Inxũ mã ihkrĩ xà ata kam pĩxô pâr pejti ne ihcuhhê. Quê ha jũm te pĩxô ata nō krêr na, quê ha nee jũ caxuw ihtyc nare, ne quêt ihtĩar na apuipa, rohnÿtti mã. Ne por quê ha me ampo kên cunea tohjê, wa ha itÿj pĩxô ata na me hamã, quê ha ame cuku. Hõhõ ita pit” — hajÿr.

Pĩhhôcuxwa jô krĩ kam mehkwÿ jakrã te me amji pupun xà kêanre
Me Hàpên Xà 7.54-60

⁸Ne cute hipêr imã harkwa hyr to hajÿr he:

— ÿhÿ Jowãw, ita caxuw ca ha Pĩhhôcuxwa jô krĩ kam, por ikrac ri me ikwÿ jamãr catê ata mã ijarkwa kôt ihkàhhôc ton to hane he:

— “Ipê cumã kat kam ampo cunea jô Pahhiti, ne ipê hicu xàa kam ampo itajê cunea jô Pahhiti. Ne ipê jũm tyc ne hacpÿa mã ihtĩr ata. Ne ijarkwa na ri me amã ihkàhhôc ita. ⁹Ne icwÿrjapê ate ame amji pupun xà kêanre to ame amji pupun atajê na, imã me gahkre pej. Ne icwÿrjapêa ri me apê me acukrêj jamre tu, neme apê hamreare na, ite me gahkre pej. Ne Inxũ mã me apê hamreare nare, ne ampeaj kam quêt cumã me gakràj. Ne imã cute me ato xwahna to kêanreatajê na me hahkre pej, ne me amã

me amji to ihhêj xi xà to, ‘Me ipê Juta catêjê impej pit, na wa ha itỳj me amã catyt kam ampo pejti atajêpit to hahkre’ hane. Ne cama ame amã ihhêj, ne aracri Xatanaj kôt amjikam me hapac to me ipa, ne toa amji mã mehhimpej to me ipa. ¹⁰Ne ca ha cormã ame amji pupun xà kêanre to ame amji pupu, ne nee ca ha ame amji mã pa nare, ne me ikampa he. Quê ha Xatanaj kôt me ipa catêjêihtỳj me anô pro, ne me hacjên xà kam me gaxà, ne me acajpêr hiahpuro. Ca ha ame amji pupun xà kêanre to me amcro to me tej cacrô, ca ha ito pit mãamji mã me ahimpej to me apa kam me to acrà, ne ahnaa ame gamre na, wa ha amji wỳr me ato ahtêp, ca ha icahê na ame apa, rohnỳtti mã. Ne pom hãnne memprar tỳj catêjê mehkwỳ re, ne amji mã me hê cwa, ata jikjê na, ca ha ate me gũcanãr na, wa ha itỳj me amã me atĩr xà caxuw me gahĩxà gŏ, ca ha me atĩr rohnỳtti mã.

¹¹“Yhỹ me ikwỳ, xà ajkĩ me gapac nare me gũpar xà caxuw? Hãpà! Ihtỳj me akam me gapac. Na ca ha me Apãm Carô Pejti te mehkwỳ jakrã mã harên xà ne me kampa ne mempartu. Ne por quê ha me ampo kên cunea tohjê atajê, quê ha nee hipêr amehtyc nare, ne nee hipêr ame amji pupun xà kêanre nŏ to ame amji pupun nare. Hŏhŏ ijarkwa ita pit” — hajỹr.

Hawênti jŏ krĩ kam mehkwỳ jakrã te nee mehpahãm nare atajê jicu nare

¹²Ne cute hipêr imã harkwa hyr to hajỹr he:

— Yhỹ Jowãw, ita caxuw ca ha Hawênti jŏ krĩ kam, por ikrac ri me ikwỳ jamãr catê ata mã ijarkwa kôt ihkàhhôc ton to hane he:

— “Ipê, por jũm jarkwa kam wapo xwahhihti xwapeaj te hũjê ata jarkwa na mã, me amã ihkàhhôc ita he. ¹³Ne imã Xatanaj to me amji mã mehhimpej catêjê jipôc ri ate ame akrĩ na, imã me gahkre pej. Ne curia ri cute me Antipa curan. Ito me cumã ihcakôc to ipa, incwỳrjapê ri cute mehcuran cacrô, ca nee ate itoamji mã me ahimpej jicu nare, ne ikam me to acrà tu.

¹⁴“Ne ampo ata pyxit peaj ne ahna imã me ana prãm nare. Nee mã ampo nare, me akwỳa kwỳ ihtỳj Parãw xwỳ himpej xà kêanre atajê to ame amji mãmehhimpej to me ipa. Ne pê Parãw xwỳIxaher catêjê to kên prãtme cumã Xatanaj me, ampo carô kên to ihhimpej to: ‘Gapacta ne me pryre jãhtôa ne me to cuprô ne me hipej, ne Xatanaj me, me amã ampo carô kĩntiatajê mã me to amji kĩn nŏ to, nehanea ne atỳj ahti na amji pê me aprô to meaxy’ hane. Mã me akwỳa kwỳ te ihtỳj ihhimpej xà ata mã me amji jŏr, ne toa amji mã mehhimpej to me ipa. ¹⁵Ne hanea ne me akam Nicoraw kôt me ipa catêjê te me to ihhimpej catêjê ame ipa. Ne me imã ampo itajê nŏ na prãm nare. ¹⁶Cwỳrjapê wa me amã, ‘Me amji to apkjê, ne me akên itajê jicu. Ca ha ate me akên itajê jicu nare na, wa ha me awỳr itêm pyrentu, ne pomijarkwa pĩn wapo hapôj ita to, ate me hajỹr catêjê cunea cuna mã ajpu’ hane.

¹⁷“Ŷhỹ me ikwỳ, xà ajkĩ me gapac nare, me gũpar xàcaxuw? Hãpà! Ihtỳj me akam me gapac. Na ca ha me Apãm Carŏ Pejti te mehkwy jakrã mã harĕn xà na mekampa, ne mempartu. Ne por quĕ ha ame ampo kĕn cunea tohjĕ, wa ha itỳjaracri me cumã harte, quĕ ha nee jũm ite me cumã harte ita na ijahkre pej nare, to hanea, pom quĕ pĕ wa Juta catĕjĕ mã me hŏ pĕ mana to harte he. Newa ha ahpỳanre na kĕn jakatiatajĕ kam me cumã me haprỳ to ipintuw partu. Quĕha nee jũm me haprỳ itajĕ jahkre pej nare, ne me cumãa quĕ ha me haprỳ atajĕ jahkre pej. Hŏhŏ ijarkwa ita pit” — hane.

Me hũxy xi cahãj nŏ te Tijat jŏ krĩ kam mehkwy jakrã mã ihhĕj
Juta 3-23

¹⁸Ne cute hipĕr imã harkwa hyr to hajỳr he:

— Ŷhỹ Jowãw, ita caxuw ca ha Tijat jŏ krĩ kam, por ikrac ri me ikwỳ jamãr catĕ ata mã ijarkwa kŏt ihkãhhŏc ton to hane he:

— “Ipĕ me Apãm kra, ne ito jarwrỳ pĕ ihhĕj rũm cuhy pŏc jarwrỳ ata, neipar prã pĕ ŏr te me hũhhi na hĕ xà prã pyrãcti ata. ¹⁹Ne imã me gãpĕn xà cunea na me gahkre pej. Ne me amã ajpĕn kĩnti, ne ate me ajpĕn tehcajpar na, imã me gahkre pej. Ne imã ate itoa me amji mã meahimpej, ne amji mã me aprĩa kam ampo kĕn mã me gũcanãr na, imã me gahkre pej. Ne ca mam me acaca xà atajĕ jirŏa pĕ me to apicamĕn to me mŏ.

²⁰“Ne por ampo ata pyxit peaj, ne ahna imã me ana prãm nare. Nee mã ampo nare. Por me acahĕ na pyjĕ nŏ kĕanre apu ipa ata, ca ajte nee ihkĕntĕte me cumãn nare, ne cama ahna me hamã. Mã ihtỳj apu ihkĕn xà atajĕ ton to ipa. Ne pyjĕ nŏ kĕanre ata pĕ ihhĕj rũm mam pyjĕ nŏ kĕanrejaprỳ te Ixapewkwỳj xwỳ ata pyrãac, ne me amã amji jarĕn to, ‘Pahpãm te ri me awỳr ikujahĕc, ite catyt kam me amã ampo to hahkre to hajỳr prãmtehe. Gapacta ne ahti na amji pĕ ame aprŏ caxu, ne hanea ne atỳj cute ampo carŏ kĕnti mã me hŏ ton atajĕ ku’ hane. Ne cute me cumã ampo to hahkre to hajỳr xàatajĕ to hãn ne ijŏ pry kaj na imã me hãpĕn catĕjĕ atajĕ rĕ. ²¹Ne tee ite mentĕte pyjĕ nŏ ata mãn to, ‘Me to kĕn jicu!’ hajỳr. Mã ma apu ipar caca.

²²“Cwỳrjapĕ wa ha to kĕn prãmte cumã ijarkwa to, ‘Hã, ita caxuw ca ha atỳj ahti na ate me hũmre to gikwa, ne ame to axỳ xà ita kam nŏ. Ne itacaxuw quĕ ha gikwa xà ata amã ihkĕanre, ne hanea ne, por quĕ ha acahĕ na kam me hikwa atajĕ mã ihkĕanre ne. Ne ihtỳj ate me amji pupun xà kĕanre to me amji pupun to acuhhĕ na, me ato’ hane. Quĕ ha cute meipar nare, ne nee mehkĕn ton jicu nare atajĕ cunea mã, quĕ ha itajĕ hane. ²³Ne itỳj cupĕ mehkra cunea jipej. Quĕ ha pea me ikwỳ me ahna ijahkre pej, ne hanea ne ite me hũmre cunea mã cute me amji kam hapac xàjahkre pej na me ijahkre pej. Ne pa wa ha ahpỳanre na ate me ampo ton atajĕ mã ampi, ne hahpan xà na me amã ijãmjŏr pa.

²⁴“Por tee me amã harkwa to, ‘Hacu ne Xatanaj jarkwa to ame hahkre, ne to amji mã me pahhimpej to me papa’ hane. Ca nee ate mempar nare, ne nee mehkôt me amji ton nare atajê, wa nee hipêr na me gapackre prãm nare. Ampo na? He ca atÿj ramã amjia kôt me gũpar to me apa. ²⁵Ne kam me to acrà mã me awcanãa ne, wa ha ahnaa me awÿr icato. Hô, hamre, ite me gapackre xà ita pit” hane.

²⁶— “Ne por quê ha me ampo kên cunea tohê, ne ma imã ampo na prãmti kĩnti atajê ton kam me to incrà, ne ahnaa amehtyc na, wa ha me to krìxàre cunea jô pahhi to hanea, pom quê Inxũ te ito pjê cunea jô Pahhi he. ²⁷Quê ha mehpahtÿaj kam me to ihhimpej to me ipa. Quê ha jũm te apu Pahpãm par caca na, quê ha me gãn to hane, pom quê hãn ne me pjê te pot gã he. ²⁸Ne me to ihhimpej xà to prà to hanea, pom quê awcahti xà wÿr caxêti prà he. Mã mehcunea me hõmpu, mã me cumã hõmpun xà impejti he.

²⁹“ÿhÿ me ikwÿ, xà ajkĩ me gapac nare, me gũpar xà caxuw? Hãpà! Ihtÿj me akam me gapac, na ca ha me Apãm Carô Pejti te mehkwy jakrã mã harên xà na me kampa ne mempartu. Hô, ite me gapackre xà ita pit” — hajÿr.

Pyt jô krĩ kam mehkwy jakrã te amji kam me hapac xà kãanre

Ruc 12.35-40

3 ¹Ne cute hipêr imã harkwa hyr to hajÿr he:

— ÿhÿ Jowãw, ca ha ita caxuw Pyt jô krĩ kam, por ikrac ri me ikwÿ jamãr catê ata mã ijarkwa kôt ihkàhhôc ton to hane he:

— “Ipê Pahpãm Carô Pejti caca xà te xet atajê cahê na ipa catê, ne ipê jũm jũhkra kam caxêre te xet ata. Ne imã me gápên xà cunea jahkre pej. Mã mehcunea amji mã me garên to, ‘Jeju kôt me ipa catêjê atajê toa amji mã mehhimpej to me ipa’ hane. Ne cute ikôt me apa na amji mã me garêncatêjê atajê mã ihhêj ne me atĩar. Ne mehkĩnte imãa ihhêj ne ramã ame acuneatyc. Ampo na? Ca nee amji mã me ito ahimpej nare. ²Ame ampra! Nãmri ca cormã kyre pê ito amji mã me ahimpej, na ca ha ita caxuw ito amji mã me ahimpej to ihtÿaj to ihtÿj. Nãmri ca ha ate amji mãme ito ahimpej nare na, ca ha atÿj ikôt me apa jicu, ne pea imã me apê mehtyc pyrãac. Ne mër ampo na mã wa ame amã Inxũ cawpa to icakôc to hane? Ampo na nare. Pom ca ate me gápên xà cunea ton itajê ri, nee Inxũ cuna mãcumã impej nare.

³“Cwÿrjapê ca ha ate me ampo jahkre pej, ne me hõmpun atajê to me amji japackrea ne, ne hÿrmã me apkjê, ne amji mã me hũpahti to me apa. Ampo na, wa ha hacpÿ ne pjê wÿr me awÿr itêm xà ata pê ihhêj rũm mehàhkij xi têm xà pyrãac, na wa ha aracri tẽ. Quê ha nee jũm itêmxà ata na ijahkre pej nare. Cwÿrjapê ca ha me ampra!

⁴“Ne me akwÿ kam me pyxitre atajê ri amã mempeaj to mempej. Ne mempej ita pê ihhêj rũm cute amehkã jakati tũm nare mã me amji jacjên,

ne maihtũm pê me to amji cajhê to ame ipa, mã nee apu ihtũm nare, ne hakati ata na, atapyràac. Ne ikôt me akà jakati kam me apa xà caxuw, ampeaj kam me apej, cwÿrjapê ca ha atÿj jũ caxuw icahi na ame apa” hane.

⁵— “Ne por quê ha me ampo kên cunea tohjê, ne ma imã ampo na prãmti kĩnti atajê ton kam me to incrà, ne ahnaa amehtyc na, wa ha itÿj me cumã mehkàjakati atajê gô, quê ha kaam ame ipa. Wa ha nee jũ caxuw hacpÿa mã mehtĩr xà jô kàhhôc kam ramã ame haprÿ hikwa itajê nõ caxàr neihhur nare. Ne hirãa pê cama Inxũ mã me hàpên catêjê kam mare mã, me ahna amji jarên to, ‘Pom mempejti mehkà jakati kam ame ipa atajêcunea pê itekjê, ne me cupê me ikwÿa’ hane.

⁶“ÿhÿ me ikwÿ, xà ajkĩ me gapac nare, me gũpar xà caxuw? Hãpà! Ihtÿj me akam me gapac, na ca ha me Apãm Carô Pejti te mehkwy jakrã mã harên xà na me kampa, ne mempartu” — hane.

Ihkjêkĩn jô krĩ kam mehkwy jakrã mã Pahpãm mã hàpên xà
1 Texarôn 2.13-16

⁷Ne cute hipêr imã harkwa hyr to hajÿr he:

— ÿhÿ Jowãw, ita caxuw ca ha Ihkjêkĩn jô krĩ kam, por ikrac ri me ikwÿ jamãr catê ata mã ijarkwa kôt ihkàhhôc ton to hane he:

— “Ipê rÿ jũ caxuw jũm te ampo kên nõ ton nare ata, ne ihcunea na ipeaj to ipej. Ipê rÿ jũ caxuw jũm te ampo to ihhêj xi nare ata, ne wa icakôc xà hêj xi nare to icakôc to ipa. Ne pê rÿ pëa mã pahhi Tawixwÿ ikre nõ impejti ata kam ihkrĩ. Pê pea jũm ata pyxit peaj ne hũrkwa jihê rên xà ata to ajco apu ipa. Jĩkjê na ri ipyxit peaj ne imã Inxũjũrkwa jihê rên xà. Na wa ha to hihê mē, quê ha nee jũm to hihê nare. Nãmri, wa ha ite to hihê na, quê ha nee jũm hihê mên nare. ⁸Ne ramã ite me gápên xà atajê na me gahkre pejtu, ne ite me acarôt peacre na me gahkre pej. Cakrô ca atÿj ijarkwa kôt ame apa, ne itoa amji mãme ahimpej to me apa. Na wa ite me amã harkwa jihê mên, ate ahna me gapôj ne iwÿr me jũmjê japrôr ne me to acator, mã me acuxà ikôt me ipa prãmte. Wa ite me amã hihê mên, mã ahnaa xa, na quê ha nee jũm to hihê nare.

⁹“ÿhÿ, me akam jũmjê ame ipa atajê pê Xatanaj tekjê. Ne ihtÿj meamã amji jarên to ihhêj xi to ipa to, ‘Me ipê Juta catêjê, ne me ipeaj to me ipej, naca ha atÿj me ikampa. Ampo na? Wa ha itÿj me amã catyt kam ampo pejti atajê to pit mã me amã hahkre’ hane. Cakrô, wa ha nee me to amji kwÿnare. Ne cama me hipy mã me amē. Ne acuna mã, mehkôn krã na amehkrĩ na me to, quê ha me garên to, ‘Ampeaj kam ri, quêt me apê Pahpãm kôt meapa catêjê, ne ampeaj kam ri quêt me cumã akĩn!’ hane.

¹⁰“Pê wa me amã ijarkwa hyr to hane he: ‘Me awcanãa ne, ne ampo cunea na amji mã me aprĩa to me apa’ hane. Ca ate me ijarkwa ita par pyrentu, ne atÿj megũcanãr to me apa. Cwÿrjapê wa ha itÿj ampo kên

atajê cunea pê me apytà. Por ite pjê kam ampo kên cunea to me capi ne to mehcajpêr xà ata pê, wa ha me apytà. ¹¹Ne wa ha nee amji to ijàhtëüm nare ne ajpên me awÿr tē. Ite me amā ijàmjör prämte, wa ha me awÿr tē. Cwÿrjapê ca ha ite me amā ijàmjör xà to ajpên me awÿr itēm xà ata jahkà na meawcanāa ne. Nāmri ca ha ate me gūcanār nare na, ca ha nee me gàm cwÿr nare, ne me gàm cwÿr xà ata to me acto, quê ha jüm me gaxà kam amji mā cupy” hane.

¹²— Ne por quê ha me ampo kên cunea tohjê, ne ma imā ampo na prämti kinti atajê ton kam me to incrà ne ahnaa amehtyc na, wa ha ma jüm ata to Inxüjürkwa wÿr tē, ne to axà, ne pea ihhêj rüm to ikre mā ihcuhhê xà, ne ikre ata mā kam hām. Quê ha curia ihcuhhê rohnÿtti mā. Wa ha pea kam me ijapry încrê na ihhêc to hane he. Wa ha kam Inxü japry na ihhêc, nekam, por quê ha Inxü, cōjkwa pîn pjê wÿr, hō krī tuw Krīpinkrên kujate ata japry naihhêc. Ne wa ha hanea ne kam ijapry intuwti ata na ihhêc.

¹³— Ÿhÿ me ikwÿ, xà ajkī me gapac nare me gūpar xà caxuw? Hāpà! Ihtÿj me akam me gapac, na ca ha me Apām Carō Pejti te mehkwy jakrā mā harên xà na me kampa ne mempartu — hajÿr

Ratixa jō krī kam mehkwy jakrā me cupê Pahpām tekjê na me amji jarên na me amji to ihhêj

Roman 12.11; Jowāw 9.39-41

¹⁴Ne cute hipêr imā harkwa hyr to hajÿr he:

— Ÿhÿ Jowāw, ita caxuw ca ha Ratixa jō krī catêjê kam, por ikrac ri me ikwÿ jamār catê ata mā ijarkwa kôt ihkàhhêc ton to hane he.

— “Ipê mehhêj xi nare tekjê, ne ipê mehhêj xi nare catêjê xakat, ne ipê jüm te amji jarkwa par to ipa rohnÿtti mā ata, ne ipê catyt kam ampo cuneajarên catê. Ne pa pê wa Inxü jarkwa kôt pjê me ampo cunea ton pa, ne ipêa ri ampo itajê cunea xakat. ¹⁵⁻¹⁶Ne imā me gápên xà cunea jahkre pej. Ca ha ikôt me apa na amji to mehtÿj tu na, wa ha itÿj me ana prām. Nāmri ca ha ate kyre pê ikôt me apana, wa ha nee me ana prām nare. Ampo na? Ihhêj rüm ate me hajÿr catêjê pê cō cacrujre na, imā prām nare ata. Ne nee me ato ikôm xà caxuw me apej nare, ne nee me gakryti nare, ne nee me acacrohti nare, ne meacacrujre. Cwÿrjapê wa ha ijarkwa pê me gaxwÿ.

¹⁷“Ampo na mā wa ame amā icakôc xà ita to? Nee mā ampo na nare, ca me caahān ne amji mā me garkwa to, ‘Ampeaj kam me pajakràj! Ne ampo cunea na me pahte amji mā me prām atajê ramā me pamā! Ne nee ahna ihkên nare!’ hane. Hajÿr cakrô, mā me apê amji jahkre kêatre, ca nee ampo kôt me hakop nare kam amji mā ame garkwa to ame hane. Ne Inxü me imā nee ate me hajÿrnare! Ne me imā me apê ampo hamreare, ca me acakrô ame apa, ne me acunea into tùm pit. Ca nee ate me amji pupun

xà kēanre kam me apahàmti ata na, ate me amji pupun ne ahna me amji jahkre pej nare, ne me imāa ri me ate me hajÿr xà itajê jahkre pej.

¹⁸“Cwÿrjapê wa ha gapackre, ne me amā. Ajpên iwÿr me pra, ne amji mā me ate amji kam me gapac xà pejti pê ôr prà pyràcti atajê jūhkà, ne pea atÿj to Inxū me imā me gakràj. Ne hanea ne, ca ha iwÿr me pra neamji mā me icarôt jūhkà, ne ihkôat catyt kam me apa, ata pê ri ihhêj rŭm me akà jakati atajê mā ate me amji jacjên, ne kam ame apa ata pyrâac, meapahàm cupate. Ne hanea ne iwÿr me pra ne amji mā me ite amji jahkre pej pê ihhêj rŭm mento cahhê xà pyrâac ata jūhkà, ate me amji jahkre pej, ne mearît pej me ate me to ampo pupun xà caxuw.

¹⁹“Xà ajkī me imā me akīn nare na mā wa ame ato kēanre, ne ame gapackre xà tÿjti itajê to ame gapackre? Hâpà! Imā me akīnti, incwÿrjapê wa itÿj ampo kên itajê cunea intête me amān to me gapackreto ihtÿaj to ipa. Hôhō, ita na wa ijôtpê imā mehkiñti atajê to hajÿr to ipa. Cwÿrjapê ca ha caxwām catia mā iwÿr me apkjê. ²⁰Ne wa ihhêj ne ikre cunea jarkwa mā icuhhê to ijâhcukjêr to ipa, ixâr prâmtē. Quê ha jŭm te ijôkre par, ne imā hihê mên, wa ha iteixâr ne cahê na ijâpàn na, quê ha ihtÿj jŭ caxuw hanea ne icahê na apà.

²¹“Ne por quê ha me ampo kên cunea tohjê, ne ma imā ampo na prâmti kīnti atajê ton kam me to incrà, ne ahnaa amehtyc na, wa ha itÿj amji cahê na ikrīxà ata kam me hÿr. Quê ha curia icahê na amehkrī rohnÿtti mā to hanea, pom quê pê wa ampo kên cunea tohjê ne hakren pa, pê Inxū amji cahê na ihkrī xà ita kam ijÿr, wa cahê na kam ikrī, ita na wa ha me to.

²²“ÿhÿ me ikwÿ, xà ajkī me gapac nare, me gŭpar xà caxuw? Hâpà. Ihtÿj me akam me gapac, na ca ha me Apām Carō Pejti te mehkwy jakrā mā harên xà na me kampa ne mempartu” — hajÿr.

Côjkwa kam mehkrī catêjê cunea mā Pahpām to cati prām

4 ¹Hô, cute imā harên to hajÿr jirô pê wa ite hipêr ampo pupun. Ne nee mā ampo nare, côjkwakam ri harkwa ata te amji jihê mên. Mā jŭm jôkre pê ihhêj rŭm hôhhi jôkre pyràcti ata te imā hŭjarên to hajÿr. Pom pê wa mam kampa ita na ri cuteimā hŭjarên ne imā:

— Iwÿr api, wa ha amā ampo te jŭ măn xà ata jahkre ne amā to ajpê, ca ha hōmpu! — hajÿr.

²Me ajkaam mā Pahpām Carō te imā amji jôr. Wa curi côjkwa kam, ite Pahhi krī xà kam jŭm ata jÿr na hōmpun. ³Mā ihkuc prà pê kên prà tatapti ata pyrâc, ne cupê kên prà tepti ata pyrâc. Ne ihkrī xà pu na ihpra krorti ata pê ihhêj rŭm ta jôxwÿn.

⁴Ne Pahhi krī xà ata pu na mehkrī xà kwÿ jâhtô na cute winticwat, mā kampahhi catêjê te winticwat, ne mehkà jakati kam mehkrī, ne ôr te wakÿre prà pejti ata te mehcunea krâhkà. ⁵Ne me hipôc ri Pahhi

krī xà ata pīn ri ihcuxê, ne kam me hōkre, ne hàhkrihkrit pê pahhàjê pyrãcti. Ne Pahhi krī xà ita cuna mã hàhcujro xà te zet, atajêpê Pahpãm Carō Pejti caca xà te zet atajê pyrãc, ne hàhcujrohti. ⁶Ne Pahhi krī xà ita cuna mã ampo pê cô cati pê wit pràti tetetti ata pyrãac ne nō. Ne Pahhi krī xà ita pu na pê jūmjê tīar te cwatatajê te mehkrã ne me to xa. Ne jūmjê tīar te cwat atajê kam into jàhtōa to hàhtō, me hī cunea kam. ⁷Ne mam ita pê ihhêj rŭm rop hòhtia pyrãc. Ne ihcote na ita pê ihhêj ne pryti xŭmtia pyrãc. Ne hapu na ita kuc pê ihhêj rŭm me hŭmre kuac. Ne hapu na ita pê ri ihhêj rŭm hàctia te apu ihtor pyrãc. ⁸Ne cute me cwat itajê kam pê ahpyanre na me hara xêj partu. Ne caxwãm pê mento, ne pō rŭmmento. Ne nee caxwa me amcro kam mençrer to hicu nare, nemençrer to:

“Apejti!

Ne quêt apejti ita pê Pahhiti pê Pahpãm!

Ne ca ri quêt acarôt tÿjti, mehcunea jirōa pê.

Ne apê mam ata, ne apê cormã ata,

ne apêcormã ata rohnÿtti mã” hane.

⁹Ne cute me cwat atajê hipêr Pahpãm mã mençrer to:

“Quêt mehcunea mã acatihti na gahkre pej,

ne apejti na me cumã gahkre pej.

Ne mehcunea amji mã me acupa.

Ne mehcunea jirōa pê acarôt tÿj!” hajÿr.

¹⁰Ne hãn ne cute me cwat atajê Pahpãm pê Pahhiti mã mençrer kam pra, mã pea pahhi te winticwat itajê Pahpãm cuna mã mehpÿpÿm, ne Pahhi krī xà ata cunamã me hō krãhkà atajê nō, ne me harên to:

¹¹“Me ijō Pahhiti pê me ijō Pahpãm,

quêt apejti neacatihti,

mã quêt mehcunea amji mã me acupahti to me ipa.

Ne quêt acarôt tÿjti, ne ampeaj kam apej.

Ampo na?

Pê ca quêt ampo cunea to.

Ne ate amji mã toapijapar xà na ihprãmti ata to, ca to ajpa” hane.

Ihkàhhôc na hê xà te zet atajê

5 ¹Wa ite Pahhiti krī xà kam jŭm jÿ ata jŭhkra kam, awpôc rŭm, ihkàhhôc krãre ata pupun. Mã ihkàhhôc ata kam ihhôc te hŭjê, caquêc kam ihhôc, ne hanea ne hōkwa kam ihhôc. Mã ahna hê xà te zet

atajê te ahna hê. ²Ne hanea ne ite Pahpām mā memprar catê nŏ tỳjti ata pupun, mā ihkrāhhia kam cute hàhcukjêr to:

— Jūm ri ihkàhhôc ita tête ahna hê xà itajê jirên xà caxuw impej, quê hihê mē? — hajÿr.

³Mā nee cōjkwa kam ihkàhhôc ata caxuw jūm hamreare, ne nee pjê kam caxuw jūm hamreare, ne hanea ne nee pjê krac ri caxuw jūm hamreare, cute ihkàhhôc atatête ahna hê xà na ihtô xà itajê jirên, ne caxwām pê hōmpun xà caxuw. ⁴Pê wa ajco amrāa to amrā. Ampo na? Pê nee ihkàhhôc na hê xà jirênxà ata caxuw jūm impej nare, cute ahna hê xà atajê jirên, ne caxwām pê irīt ne cute hōmpun xà caxuw. ⁵Mā pahhi na mehkwy nŏ ata te imā:

— Apu acwÿr nare, hōmpu he, Juta na mehkwy jŏ Pahhiti pê rop cahàcti jŏkre hŏhti pyràcti ita ri me hirôa pê carôt tỳj. Ne cupê pahhi Tawi xwÿ tàmwxÿtàmwxÿ, Juta tàmwxÿ, ne taa mā quê ha ihtÿj ihkàhhôc na ihtô xà te xetitajê jirên pa, ne capô ne hōmpu — hajÿr.

Jeju pê carà cahàcre kra nŏ pyràc, mā jūm jaxà kam cute mehcuran xà

⁶Wa pea ite carà cahàcre hŏhti kra xūmre nŏ pupun, mā Pahhiti krī xà cuna mā xa. Mā cute me cwat atajê me, pahhi catêjê atajê te mehkra. He pê ihhêj ne jūm carà cahàcre kra xūmre ata cura, mā hacpÿa mǎihtir ne xa ata pê me pajŏ Pahhiti pê Jeju. Ne kam hipàr te xet, ne kam into te xet. Ne cukrà xà te xet atajêpê Pahpām Carô Pejti caca xà te xet atajê, mā pjê wÿr hân ne mehkujate, atajêa ri. ⁷Mā pea Caràcahàcre Kra ita mŏ, ne cute, por Pahhiti hÿr xà kam jÿata pê awpôc rŭm hŭhkra kam ihkàhhôc ata caxàr. ⁸Mā pea, pom cute me cwat itajê me, pahhite winticwat atajê me, cuna māmehkôn krā na mehpÿm. Ne pê ahpÿanre name cumā me hàkôr xà. Ne ahpÿanrena me cumā ampo kŭm cuxwati atajê te wakÿre pràti atajê to hipu partu atajê pê Pahpām na mehkwy te me to cumā mehçakôc xà pyràc.

Ihkàhhôc jihê mên xà caxuw Jeju pej

⁹Pê ajco mençrer tuw to mençrer to me hane he:

“Ate ihkàhhôc ita pyr ne hihê mên xà caxuw ampeaj kam apej!
Ampo na?

Pê ca ty, ne acaprô jaxwÿ.

Ne acaprô jaxwÿr ata to Pahpām mā pjê kamkrīxàre cunea pê
mehkwÿ japrô,

ampo kra me, me harkwa pihho to mehçakôc catêjême,
pjê cunea kam atajê cunea pê ca me haprô.

¹⁰Ne amji mā mehçunea to amā me hàpên catêjê.

Ne me taa mā quê ha mehkwy to me amā mehçakôc,
ne me taa pjê cunea to mehhimpej” hane.

Pjê me cōjkwa kam mehcunea ame Jeju catia to me cumā ihcakôc

¹¹ Wa hipêr irît ne ite Pahpām mā memprar catêjê jàhtëa to hàhtô ne me hōmpun, ne me hàhtôti atajê pê jūm te me cahyt par xà nare. Mācute Pahhiti krī xà me, cute me cwat itajê me, me pahhi itajê krā tu ne me to xa, ne kÿj cati pêa mā cute me cumā harēn to:

¹² “Apê Caràcahàcre Kra pê Jeju.

Pê ca amji to me ikritxwÿ, pê ca ijaxà kam ty ne apeaj to apej.

Ne me hirôa pê atÿj, ne me hirôa pê gakràj, ne me hirôa pê ate amji jahkre pej, ne me hirôa pê ahihtÿj!

Mā pjê cunea kam amji mā me acupa, ne mehcunea mā apejti na gahkre pej, ne me imā mehcunea te acatihti me apejti name garēn na me to prām!” hajÿr.

¹³ Ne pea ite ampo pryre cunea increr na kam ijapac. Cōjkwa kam cuwēnti me, pjê kam pryre me, pjê krac ri pryre itajê me, cōxwakam tep me, pjê cunea kam, pryre cunea increr na kam ijapac. Mā cute mençrer to hajÿr he:

“Por ca ajÿr xà kam jÿ ata me,

Caràcahàcre Kra ata me,

wa acatihtiimpejti na me garēn to prām.

Mā pjê cunea kam amji mā me acupa,

ne mehcunea mā apejti na me gahkre pej,

ne mehcunea jirôa pê me acarôt tÿj rohnÿtti mā” hajÿr.

¹⁴ Mā cute me cwat itajê me kampa ne me cumā:

— Ÿhÿ, ampeaj kam! — hane. Mā pahhi atajê mehkōn krā na mehpyÿm, ne catihti impejti na me harē.

Hūmre cawrô jakati kam jÿ ata pê me cupê amji mā hütàr catê

6 ¹ Wa pea ite Caràcahàcre Kra te mam, pom ihkàhhôc na hapÿn xà te xet itajê nō hyr na hōmpun, ne pea ite, pom cute me cwat itajê nō jōkre pêpahhàjê jàhkrihkrit ita par, mā cute kÿj cati pêa mā hàkjêr to:

— Ajpên mō! — hajÿr. ² Wa irît, ne ite cawrô jakati ata pupun, mā ajpên tē. Mā kam me hūmre nō ata jÿ, ne cumā cuuhê, mā cute me cumā pahhi krāhkà jōr. Mā ma totē ne ihtÿj amji mā me cupê pjê cunea pytār to mō.

Hūmre cawrô caprêcti kam jÿ ata pê me ipijapu to hapôj catê

³ Jirô pê mā ri, hipêr Caràcahàcre Kra ita te ahna hapÿn xà nō ata hyr. Wa pea ite cute me cwat atajê nō te amji to cote ata par, mā cute hàkjêr to:

— Ajpên mō! — hajÿr. ⁴Mã pea cawrô nõ caprêcti ita cator ne ajpên mō. Ne kam hÿr catê ata te pjê kam, cute me ipijapu ne me hÿmre te pjê kam me amji kwÿa curan xà caxuw, amji na hÿpar. Mã jÿm te cumã caxuw wapo xwahhihti nõ catiaita jôr.

Hÿmre cawrô tycti kam jÿ ata pê mehkôt prãm cràn catê

⁵Ne Caràcahàcre Kra ita te hipêr ahna hapÿn xà incrê hyr xà ita kam, wa ite cute me cwat atajê nõ te me to incrê ata par, mã cute hàkjêr to:

— Ajpên mō! — hajÿr. Wa irít ne ite cawrô tycti ita pupun, mã ajpên mō. Mã kam hÿr catê ita te hÿhkra to cute ampo to ipipên xà ita pyr ne kam to jÿ. ⁶Mã cute me cwat itajê cajpuaw jÿm jôkre ita jÿjarên ita te hajÿr he:

— Amcro pyxit kam me hàpên xà jahpan xà na, me cumã arÿjhy na crat to pyxit peaj ne agô. Ne kwÿr xôm na, ca ha me cumã crat to incrêne me cumã agô, amcro pyxit to me hàpên jahpan xà na. Ne hō kryjre to ampeaj kam me cumã hÿ to ahwÿ. Ne nee ampo to impê xà me, ampo itajê nõ to apicacwÿr nare, ne nee hanea ne ampo cacôxÿre ita me ampo itajê nõ to apicacwÿr nare — hajÿr.

Hÿmre cawrô tatapre kam jÿ ata pê me hipej catê

⁷Jirô pê mã ri Caràcahàcre Kra te ahna hapÿn xà te cwat ita hyr. Wa ite cute me cwat itajê nõ te me to cwat ata par, mã cute hàkjêr to:

— Ajpên mō! — hajÿr. ⁸Wa pea irít ne ite cawrô tatapti ata pupun, mã kam hÿr catê ata kam jÿ, mã cute me cumã haprÿ jôr to Me Hipej Catê. Mã ramã pjê kammehtyc catêjê ihkôt ame ipa. Ne pea cute pjê kam me hipej na amji na hÿpar to hajÿr he:

— Ca ha ahpÿanre na mehcuran xà cunea to mehcuran to apa. Quê ha me hÿmre me cwat, ca ha me ipijapu na me to, quê ha me ajpu ne me amji pyxit ne me amji cura. Ne prãm me, me hà me, pjê kam ampo kên jàprê cunea to mehcuran to hane he. Quê ha me hÿmre me cwat, ca ha mehcuran xà itajê to hân ne me pyxit ne mehcura — hajÿr.

Cute mehkwÿ jipej jahpan xà na, cute me to kên na me ahwÿ

⁹Mã pea Caràcahàcre Kra ita te ahna hapÿn xà te xÿc ita hyr. Wa pea ite Pahpãm mã ampo kÿm cuxwati to caxàr xà ata pupun. Mã ihkrac ri mecaxwÿn jàhtôa ne me jÿ, atajê pê Pahpãm jarkwa to mehcakôc catêjê te catyt kamme ipa, mã me curê xwÿn te amehcuran atajê caxwÿn, wa ite me hōmpun. ¹⁰Mã mehkrãhhia kam cute ame caràr to:

— Me ijō Pahhiti impejti ne carôt tÿjti ata! Ampeaj kam apê Pahpãm ata! Jÿ caxuw ca ha pjê kam itajê cukij? Ne jÿ caxuw ca ha cute ame icuran catêjê itajê to apu ihkên, cute me icuran jahpan xà na? — hajÿr. ¹¹Mã ahpÿanre na cute me cumã mehkà jakati atajê jôr partu, ne me cumã:

— Ca ha cama ame akôt to mehkryjre ne. Ne hanea ne cute ame gâpên xà ita to me hâpên, ne me ato amji kjê catêjê kwý jikaj. Por quê ha cormãhanea ne amehcura atajê, quê ha me akôt me cato ne me aràn. Ne pea cute amji mã me gâhtô na, cute me ato hũjahkre xà ata mã, me ato hahê — hajÿr.

Quê ha Pahpãm to cute ame kên jahpan xà na ame to kêanre ne

¹² Wa pea ite Caràcahàcre Kra te ahna hapÿn xà te xêj ita hyr na hõmpun. Mã pea pjê jâhcujrôn, ne pyt kam awcapàtkô tycti ita pêihhêj rûm cupêhkà tycti ata pyrâac, ne putwry întep pê ihhêj rûm me caprô tep. ¹³ Mã caxêre cõjkwa pîn apu ipijaxwÿr te hajÿr, pom quê hân ne kôc prîn mã ipâr to ahcujrô, mã hân ne apu pjê kam ajxwÿ he. ¹⁴ Mã cõjkwa jamre xà te hajÿr, pom quê hân ne ampo kà incrà amji krâ, cu me capône me cumã hikra, mã hân ne hacpÿa mã amji krâ to pra he. Ne por hakôt apu ihkrî atajê me, cõ kam amcrà jacot atajê te amji pê ihkrî xaitajê caca, ne ma cupê ipintuw partu.

¹⁵ Mã pjê jô pahhi catêjê me, krî jô pahhi catêjê me, krâhtare jô pahhi catêjême, por me hakràj catêjê atajê me, me carôt tÿjti atajê me, me hũmre cunea me, cama me cumã me hâpên catêjê me, me hõ pahhi me, mehcunea pimxur, kên kre me hàhkà jakôt krac ri ame ipimxur partu.

¹⁶ Ne cute kên kre me, hàhkà jakôt mã mehkrâhhia kam me carâr to:

— Ame ikam apÿpÿm ne ame ipro, por hÿr xà kam jÿ ata me, Caràcahàcre Kra ata te ame ikam incryc xà atajê cupate, ca ha me cupê me ito amxu. ¹⁷ Ampo na? Hamre, ramã cute ame ikam incryac to incryc jô amcroa kam hàhhuc, na wa ha nee me inõ cumã ijũcanâr nare — hajÿr.

Pahpãm na mehkwy te 144 mir kuctÿj kam haprÿa na ihhõc

Ipipên Xà 9.4

7 ¹ Jirô pê mã wa ite cõjkwa pîn Pahpãm mã memprar catêjê te cwat te me pjê jô xwahhi jô kôc te cwat na incwÿr, ne me huwahi, ne me to ihcuhhê na me hõmpun. Ampo na? Cute ame to kênxwÿjrea na mam kôc nõ te pjê me, cõ me, pî pâr nõ jakôr cupate ri cute me to amji tÿj ne me to xa. ² Wa pea ite Pahpãm mã memprar catêjêa nõ pupun, mã pyt japôj xà rûm ihtor, ne tẽ. Ne Pahpãm tîar ihkrî ata te haprÿa na cute mehhõc catê ata kujahêc, mã ihkwÿ te cwat te apu pjê me cõ cunea to kên catêjêatajê wÿr tẽ. Ne kÿj cati pêa mã cute ihkwÿ mã carâr to:

³ — Ca ha nee cormã ne ame pjê to kên nare, ne nee cormã ne ame cõ to kên nare, ne nee cormã ne ame pî pâr nõ to kên nare, wa ha xa mepajô Pahpãm tîar ata jô tekjê na ame ipa atajê kuctÿj kam haprÿa na ihhõc pa mã — hajÿr. Ne cute me kam mehhõc par.

⁴ Wa pea ite, cute Pahpãm japrÿ na mehkuctÿj kam ihhõc itajê jâhtô na me harên par. Mã me hàhtô na cute me 144 mir. Ne me cupê ahpÿanre

na Ixahercatêjê jakrã ne ajpĕn kam mehpÿm ne me xa. ⁵⁻⁸Pê Ixaher catêjê na ahpÿanre na me hakrã kwÿ amji to atajê, amji to me ajcokjê ne me xa, pêahpÿanre na ajpĕn caxuw me hakrã hàhtô na me tôxi mir. Ne Ixaher catêjê na kjêjê name amji to ne me xa atajê pê, Juta me, Rupĕn me, Cate me, Axer me, Naptar me, Manaxê me, Ximãw me, Rewi me, Ixaca me, Xepurô me, Joje me, Pĕnjamĩ.

Pahpãm na mehkwy cunea me cumã cati to ihcakôc

⁹Jirô pê wa irit, ne ite me cupêIxaher catêjê nare pê mehcakrit jãhtôapupun. Mã me hàhtôa to me hàhtô, ne jũ wÿr quê jũm me cahyt pa. Ne ahpÿanre na ajpĕn caxuw ampo kra me, pjê kam krixàre cunea me, me harkwa pihho me, pjê cunea pĩn mehcuneaPahpãm krĩ xà ata me Caràcahàcre Kra ata cuna mã mehkà jakati kam me xa, ne me hũhkra kam têrti hô pit mã, me to xa. ¹⁰Ne kÿj cati pêa mã me hũjarĕn to:

— Por Pahpãm hÿr xà kam jÿ ata, me Caràcahàcre Kra ata pê ri me ikĕn pê me ito hapôj catêjê — hane. ¹¹Pê Pahpãm mã memprar catêjê cunea Pahpãm krĩ xà ata me, me pahhi catêjê cunea me, por cute me cwat atajê pu na me ajxĕr ne me to xa. Ne mehcunea mehkôn krã na me hÿr ne pea me Pahpãm jarĕn to:

¹²— Taamã, ampeaj kamquĕt acati, ne mehcunea mã apejti na gahkre pej, nequĕt akrã krea to akrã kre. Ne ate me imã ampo pejti jôr atajê pyrĕn ampeaj kam me ijakry, ne mehcunea amji mã me acupa, ne mehcunea jirôa pê acarôt tÿj, ne me hirôa pê ahiltÿj rohnÿtti mã. Taamã! — hane.

¹³Mã me pahhi nô te icukij ne imã:

— Mĕr jũmjê mã mehkà jakati kam amehcuhê atajê? Ne jũ pĩn mã ame hapôj? — hajÿr. Wa ite cumã:

¹⁴— Pÿpÿn, ipê me hahkre kêatre, ne quĕt amãa ri me hahkre pej — hajÿr. Mã cute imã me harĕn to:

— Pom me xa itajê pê ame amji pupun xà kêanre to ame amji pupu, ne Caràcahàcre Kra ita caprô to ri cute ame amji mã mehkà itajê cahhôn, mãmehkà itajê jakaa to haka. ¹⁵Cwÿrjapê ri Pahhiti pê Caràcahàcre Kra ita krĩ xà ita cuna mã amehcuhê, ne amcro me caxwa cunea kam Pahpãm to me amji kam me hapac xà jũrkwakam me hàpĕn to pyt, ne me to apĕ, ne por hÿr xà kam jÿ ata ri ihtÿj haprÿa na me hamãr to ihkrĩ. ¹⁶Ne quê ha jũ caxuw hipĕr me cumã prãm nare, ne nee me cumã kôr nare. Ne nee quê pyt cacro me ampo cacrohti me to caxãr nare. ¹⁷Ampo na? Por Caràcahàcre Kra ihkrĩ xà jipôc ri jÿ ata, quê ha amji to me hamãr catê catihti, ne ma, por cô impejti te me to ihtĩr rohnÿtti mã xà ata wÿr me to ipa, quê ha pea Pahpãm me cumã mento cacô atajê incrã — hajÿr. Hô, cute imã me harĕn to hajÿr.

Côjkwa kam ahcarĩcti

8 ¹Ne pea Caràcahàcre Kra te ahna hapÿn xà te xet ita hÿr, mã pea côjkwa kam ahcarĩcti na ahtũm ryre. ²Wa pea irit, ne ite Pahpãm

cuna mã cumã memprar catêjê te xet ne mehcuhhê na me hõmpun. Mã cute ahpyãne na me cumã hõhhi jõr partu.

Pahpãm na mehkwy te cumã mehcakõc xà

³Mã pea Pahpãm mã memprar catê nõ ata te ampo run xà pràti pê ôr ita pyr, cumã ampo to me caxàrxà cahê na ne to xa. Cute kam ampo kũm cuxwati ata kwỳ to hipu prãmte ri to xa. Mã cute me cumã ampo kũm cuxwati catia ne hõr. Pahpãm na mehkwy te Pahpãm mã mehcakõc xà ata pê ri ihhêj rũm ampo kũm cuxwati te caxàr xà ata. Mã ma ôr te ampo kũm cuxwati te caxàr xà ata wỳr to mō, Pahpãm krĩ xà cuna mã xa ata wỳr. ⁴Ne hũhkra pĩn ampo kũm cuxwati ata kũm ma hàpir to mō, Pahpãm na mehkwy cunea te me Pahpãm mã mehcakõc xà atajê me ajkaam mã ma Pahpãm wỳr hàpir to mō. ⁵Mã pea Pahpãm mã memprar catêjê nõ ata te ampo run xà ata pyr, ne kam ampo kũm cuxwati te caxàr xà ata jō cuhy pôc to hipu, ne ma ahpar mãpjê wỳr to hũcapêr. Mã pea kam pahhãjê ahkrihkrit, ne kam me caràr, ne ampeaj kam, kam ihcuxê, mã pjê cunea apu ahcujrō.

⁶Mã Pahpãm mã memprar catêjê te xet atajê te hõhhi te xet atajê cakõr xà caxuw ame to hàhcuprõn.

Pjê kam ampo jãhtõa te caxàr

⁷Mã mam pyxit ita te hõhhi cakõr. Mã pea cuhy cator, ne kên te ta me, caprõ picacwỳr, mã ma pjê wỳr ahpar mã cute to hũcapêr. Ne hanea ne pjê jãhtõa ne cute to caxàr. Quê ha pjê incrê, quê ha pyxit ne to capa. Mã cute pĩ jãhtõa ne to caxàr. Quê ha pĩ incrê, quê ha pyxit ne to capa. Ne hanea ne cute kam põre kukũmti ata cunea to caxàr par.

Cõxwa te me caprõ na amji jahkre

⁸Jirõ pê mã ri hipêr ita te hõhhi ita cakõr. Mã ampo pê ihhêj rũm hàhkà jakõtti te apu ihpõc to ipa pyrãcti ata ihpõc to mō, mã maahpar mã cõxwa kam cute to hũcapêr. Mã pea cõxwa jĩkjê te me caprõ na amji jahkre. Quê ha cõxwa incrê, quê ha pyxit ne caprõ. ⁹Mã cõxwa kam ampo apu ipa itajê jãhtõa ne ihtyc par, mã hanea ne pàr kre jãhtõa ne hamre. Quê ha ampo incrê, quê ha pyxit ne hamre.

Cõ ajpjê atajê nõ xya to hỳ

¹⁰Mã hipêr incrê ita te hõhhi cakõr. Mã caxêre nõ catia ita pê ihhêj rũm pahte ame pajũhkra to ame pĩ pôc cwỳr, mã hãn ne apu ihpõcto ipa, mã ma cõjkwa pĩn cõ kam ihpỳm. ¹¹Ne caxêti ita japrỳ te Xỳhti. Cwỳrjapê ri cõ jĩkjê kam caxêti ita pỳpỳm atajê xya to hỳ. Quê ha cõ incrê ne ajpjê atajê nõ pyxit ne hỳa to hỳ. Cwỳrjapê ri me hũmre kwỳ jãhtõa ne cute cõ ata to mehkõm catêjê cunea tyc partu.

Côjkwa kam ampo ahcujro atajê cunea jîkjê kam awcapàtkô

¹²Mã cute to cwat ita te hōhhi cakôr. Mã pea pyt me, caxêre me putwry jîkjê pot kam awcapàtkô. Ne nee pyt jîkjê pot kam hàhcujro jō amcro jàhcujro nare, ne kam awcapàtkô. Ne caxêre te hajyar, ne putwry te hajyar, ne nee hîkjê pot kam hàhcujro nare, ne pea cajê to mō.

¹³Jirô pê mã wa irît, ne ite hàcti nō ita tor ne kàaj mã tē ata pupun. Mã cute ihkrāhhia kam hūjarēn to:

— Akỳ, akỳ, akỳ, por pjê kam amehkrî atajê, quê ha cormã me Pahpãm mã memprar catêjê incrê te me hōhhi cakôr atajê jōkre kampa, ne pea mehkên mã me axà! — hajyr.

Ampo kên pê hōxwa catia pyràc atajê me cumã mehkàj xà to

9 ¹Jirô pê mã ri Pahpãm mã memprar catê te xîc ita te hōhhi ita cakôr. Wa ite, pom pjê kam caxêti nō te ampo carō kên jürkwa kre jatōhhy nare ata jihê mēn xà pyr na hōmpun. ²Mã caxêti te kre jatōhhy nare ata jihê mēn, mã ihpîn ihkūm jicrōtti ita pê ihhêj rūm kwÿr cajror xà jicrôt, ne pom kre jicrôt cator ita te pyt pro, mã pea kÿj pê kam awcapàtkô. ³Mã ihkūm jicrôt ita pîn xycxycti itajê hapôj, ne ma pjê wÿr ajpên pra, ne ihhêj rūm incaca xà pê pactia incaca xà. ⁴Mã jūm te me cumãn to hajyr he:

— Ca ha nee ame pōre kukūmti atajê nō to kên nare, ne nee ame ahkêt to kên nare, ne nee ame pjê kam ampo pî pâr atajê nō to apu mehkēnnare. Ne por me hūmre kuctÿj kam Pahpãm japyr na ihhōc nare atajê to pit mã, ca ha atÿj amehkên. ⁵Ne nee amehcuran nare, ne cama me cumã mehkàj xà to, quê ha mehkàj xà itajê na ame amji pupun kēanre ita to ame putwry to xîc — hajyr. Ne pom quê hamehkàj xà itajê pê, quê ha ihhêj rūm pacti te ame caxwÿr xà. ⁶Putwry te xîc ita kam, quê ha me hūmre atajê tee apu amji to mehtyc xà japê, ne nee ampo te amehcuran xà atajê na ame hapôj nare. Quê ha ihtÿj amehtyc prãm cakrô, quê ha ma mehtyc xà atajê ame hahpa.

⁷Ne xycxycti itajê pê ihhêj rūm cute ame hàprê xà wÿr cute cawrô pytâr xà ame to hàhcuprôn. Ne ihkrā kam ihhêj rūm cupê wakÿre prà tepti pê ôr teihkrāhkà, ne ihkuc pê ihhêj rūm me hūmrea kuc. ⁸Ne ihkî pê ihhêj rūm pyjêa kî. Ne wa pê ihhêj rūm rop cahàcti jōkre hōhti xwaa. ⁹Ne hî pytâr xà ita pê ihhêj rūm wakÿti te ame hî pytâr xà. Ne hara jàhkrihkrit pê ihhêj rūm cawrô jàhtôa te me hàprê xà wÿr kujtikjên to ihprôt jàhkrihkrit. ¹⁰Ne cupê pactia ne hapy kam ihpêrhy, ne ihpêrhy ita pê ihhêj rūm wakÿti te ame caxwÿr xà, ne wahhi. Ne ihpêrhy ita to quê ha ame hūmre itajê caxwÿr toipa ita to putwry to xîc. ¹¹Ne ihtÿj cumã hō pahhi mã to ihhimpej, por caxêtite kre jatōhhy nare jihê mēn xà to amji pytâr ata pê ri hō pahhi. Ne Ixaherjarkwa na hapry te Apatō ne Crec jō

pjê catêjê jarkwa na ri haprÿ te Apôrijô ne, pom haprÿ itajê hūjarĕn to “Me to hamre catê”.

¹²Ne mam cute me amji pupun xà kêanre catia ita te ma ramã me hakren. Jirô pê mã, quê ha ihtÿj cormã cute me amji pupun xà kêanrepajakrut atajê cormã me hÿrmã cato.

Krãhtare me hàhtôa jipej

Roman 1.18-27

¹³Mã pea Pahpãm mã memprar catê nõ te ihkwÿ to xêj ita te hõhhi cakôr. Wa pea ite Pahpãm cuna mã wakÿre prà tepti pê ôr te ampo kũm cuxwati pôc xà jô xwahhi te cwat ata pĩn jũm jökre ita par. ¹⁴Mã cute hõhhi cakôr catê ata mã:

— Por Cômpejti jô cõhti cahi na Xatanaj mã memprar catêjê te cwat ne me huwapre ne mehcuhhê atajê mã me hê pô, ne me cumã hikra — hajÿr.

¹⁵Mã cute me Xatanaj mã memprar catêjê te cwat itajê mã me hê pôn, ne me cumã hikran. Ne pê ramã ampo itajêa na me to awjahkre, amcro ata me, putwrÿ me, caku me, mâr quê pjê kam me hũmre jãhtôa ne me hipej. Quê ha me hũmre incrê, quê ha pyxit ne ihcura. ¹⁶Ne ite me cumã cawrô kam me hàprê catêjê jãhtô na cute me 200 mirjãw na ite me harĕn par.

¹⁷Ne irĩat kam ite cawrô itajê pupun, kam me hàprê catêjê mea mã, mã me hĩ pytâr xà itajê tepti ita pê ihhêj rũm cuhy, ne ihkukũmti itapê ihhêj rũm cõjkwa kukũm, ne ihtatapti ita pê ihhêj rũm pyrãnre tatap. Ne me hõ cawrô krã itajê pê ihhêj rũm rop cahãcti jökre hõhti krã, neharkwa pĩn ihtÿj cuhy hapôj. Ne ihkũm hapôj ne hanea ne kam ihkũm tatapti ita hapôj, cute mehcuran xà caxuw. ¹⁸Ne pom cawrô jarkwa pĩn cuhy me, cuhy kũm me, ihkũm tatapti atajê te me hũmre jãhtôa ne me hipej xà. Quê ha hũmre incrê, quê ha hõtpê pyxit ne mehcura. ¹⁹Ampo na? Cawrô itajê cunea jarkwa kam ri hàprê xà, ne hanea ne hany kam ri hàprê xà. Ne hany kam ihkrã itajê pê ihhêj rũm cagã krã, mãto me hũmre cãmxa, mã mehkãj xà kêanre na, me amji pupun xà kêanre to me ipa.

Ma cute ame amji kam me hapac xà to ipintuw caca

²⁰Ne ampo te amehcuran nare atajê cahhur jãhhuc atajê te nee me hũhkra to cute ame amji mã me hõ pahpãm cahãc krekà ton atajê kĩn jicu nare. Ne nee hanea necute ame ampo carô kĕn itajê kĩn jicu nare, ne pom me hõ pahpãm cahãc krekà itajêri he: Wakÿre prà tepti pê ôr te me hõ pahpãm cahãc krekàita, ne wakÿre prà jakare te pahpãm cahãc krekà me, kĕn te me hõ pahpãm cahãc krekà me, pĩ te me hõpahpãm cahãc krekà. Ne me hõ pahpãm cahãc krekà itajê nee irĩt, ne nee hũpar nare, ne nee hanea ne ipa nare cakrô, mã ihtÿj me cumã ihkĩn. ²¹Ne nee cormã cute mehkwy curan jicu nare, ne nee cormã cute me hũxy xi jicu nare.

Ne hanea ne nee cormã cute ahti na ame pyjê caxun itajêjicu nare, ne nee cormã cute ame hàhkij jicu nare.

Ta jàhkrihkrit te xet jarĕn xà, Jowāw te ihhōc xà nare

10 ¹Wa pea ite cōjkwa pīn Pahpām mā memprar catê nõ tỳjti ata pupun, mā ajpĕn ahpar mā iwr̄yc to mō. Ne ihkà ita pĕ ihhĕj rŭm ahcakrã, ne ihkrākam ta jōxwŷn xa, mā to mō. Ne ihkuc prà ita pĕ pyt prà. Ne ihte pĕ cuhy ne kam xa. ²Ne hŭhkra kam ihkàhhōc nõ ita crire ne ihpahe hiahpuro mā to tĕ. Ne cute cō kam awpōc rŭm ihpar ita xām, ne pjĕ kam cute awke xām. ³Ne kŷj cati pĕa mā caràr, ne caràr ita pĕ ihhĕj rŭm rop cahacti jōkre hòhtijōkre. Caràr jirō pĕ mā cōjkwa pīn me hòkre jàhkrihkrit te xet pĕta jàhkrihkrit pyracti ita to cute catia. ⁴Ne cormã cumã mehcakōc kwŷa kam, wa ajmār ite ahna ihhōc, ne ramã ahna ihhōc xàa caxuw apu amji mā ahcuprō, mā cōjkwa pīn jŭm jōkre ita te imã:

— Aracri acaxwām pĕ amji mā me hŭjarĕn xà itajĕ nõ, ne nee ahna ihhōc nare — hajŷr. Wa ite impar, ne nee ahna ihhōc nare.

Pĕ Jowāw mā cute ihkrĕr xà caxuw ihkàhhōc crire gō

⁵Wa pea ite pjĕ me cō kam Pahpām mā memprar catê ata pupun, mā cute cōjkwa wŷr awpōc rŭm hŭhkra pĕr, ne ihcakōc. ⁶Por Pahpām ihtĭar ihkrĭ ne cute cōjkwa me, pjĕ me, cō kam ampo cunea ton ata jarkwa na hŭjarĕn te hajŷr he:

— Quĕ ha nee hipĕr amji to amcro nõ mĕn nare! ⁷Quĕ ha Pahpām mā imprar catê te ihkwŷy to xet ita hòhhi cakō. Quĕ haPahpām, pom pĕ ramã cumã me hàpĕn catĕjĕ pĕ harkwa to me cumã ihcakōc catĕjĕ mā, amji kam hapac xà na amji jarĕ ata to hàpĕn kam tĕ — hajŷr.

⁸Mã hipĕr cōjkwa pīn jŭm te imã ihcakōc ata te hipĕr imã ihcakōc ne imã:
— Tĕ ne Pahpām mā memprar catê nõ, cō me pjĕ kam xa ata jŭhkra kam ihkàhhōc nõ curor hiahpuro ata, cupĕ apy — hajŷr.

⁹Wa ma tĕ ne ite ihkàhhōc ita na ihwŷr. Mã cute imã hŭjarĕn to:
— Ihkàhhōc ita py ne krĕ, quĕ ha garkwa kam inxō pĕ pen xō, ne gōxà kam quĕ ha wa xŷy — hajŷr.

¹⁰Wa ite cupĕ ihkàhhōc ita pyr, ne ite ihkrĕr. Mã ijarkwa kam inxō pĕ pen xō, wa ite ihkrĕr jirō pĕ mā ri ijōxà kam, wa xŷa to hŷy. ¹¹Mã cute imã hŭjarĕn to:

— Ŷhŷ Jowāw, hipĕr amã ate ampo kra me, krĭxàre me, pjĕ kwŷy me, me harkwa pihho catĕjĕ kwŷy me, pahhi kwŷy mã Pahpām jarkwa kwŷy jarĕn xà — hajŷr.

Pĕ Jowāw cute me Pahpām kĭn catĕjĕ cahyt

11 ¹Ne cute imã ampo to ipipĕn xà pĕ pĭ cajrer pyracti ata jōr, ne imã hŭjarĕn to:

— Hã, to xa ne tĕ, ne to Pahpãm to cute me amji kam hapac xà jŭrkwa me, cute cumã ampo to caxàr xà ata to ajpĕn, ne cute me Pahpãm kĭn catĕjĕ atajĕ cahyt. ²Ne pŏ pĕ carãhti ata, ca nee to apipĕn nare. Ampo na? He kaam quĕ ha mehcahkrit atajĕ, por cupĕ Jutacatĕjĕ nare atajĕ me amji to caku to incrĕ ne ihkôt hĭkjĕ xà, na ri Pahpãm te me cumã Krĭmpejre jŏ cã carãhti ita jahkre. ³Ne wa ha ma ijarkwa to mehcahoc catĕjĕ pijakrut te xãc to mehka atajĕ ajwar kujate, quĕ ha me ijarkwa jarĕan to caku to incrĕ ne ihkôt hĭkjĕ — hajÿr.

Pahpãm jarkwa to mehcahoc catĕjĕ pijakrut

⁴Harkwa to mehcahoc catĕjĕ pijakrut itajĕ pĕ pĭxŏ pàr cacŏ pŏc pejti ata pyrãac, ne me cupĕ ihpŏc xà pijakrut itajĕ pyrãac, por Pahpãmpĕ pjĕ jŏ Pahhiti cuna mã me xa atajĕ. ⁵Quĕ ha jŭm te ame to kĕn prãm to mŏr na, quĕ ha me harkwa pĭn cuhy cato, ne me curĕ xwÿn ata to hamre. Hŏ, quĕ ha jŭm te ame to kĕnprãm to mŏr na, quĕ ha cama ty. ⁶Ne cute me Pahpãm jarkwa jarĕn to ipa atajĕ te cŏjkwa pĭn ta to me iwrÿc nare na, cute amji caxuw me hŭpar. Ne hanea ne cute cŏ kam me caprŏton xà caxuw amji na me hŭpar. Ne hanea ne cute ampo kĕn jãhtŏa to ame pjĕ to kĕn xà caxuw amji na me hŭpar.

⁷Ne caku crĕ ne ihkôt hĭkjĕ kam quĕ haame to hane, ne cormã me hŭjarĕn jicu, me ajkam quĕ ha ampo kĕnti ata kre jatŏhhy nare ata pĭn mehwyrcato, ne me kam tĕ. Quĕ ha ame ajpu ne ajwar me tohjĕ ne mehcura. ⁸Ne pĕ mam krĭ catia kam, mam me hŏ Pahhiti curaata jŏ krĭ cape na, quĕ ha me hŭmre pijakrut tyc atajĕ me nŏ. Ne por krĭ krã kĕanre ata pĕKrĭhpŏc me Ejit jŏ pjĕ krã kĕanre ata pyrãac. ⁹Quĕ ha ampo kra me, krĭxàre atajĕ me harkwa pihho catĕjĕ atajĕ cunea me nŏr ita na me hŏmpun to amcro to menchrĕ ne ihkôt me to hĭkjĕ. Ne neequĕ ha jŭm me harĕt na amji jamãr nare. ¹⁰Ne pjĕ kam quĕ ha mehcuran xà ata to ame amji mã amji kĭn to, ne hŭrĕn ame hakry. Ne quĕ ha ihtÿj me hŭrĕn me hakryte ame amji mã me ampo jŏr to me ipa. Ampo na? Pom Pahpãm jarkwa to mehcahoc catĕjĕ itajĕ te me hŭmre mã mehken xà catia ton, ne mehtyc, na ri ame hakry.

¹¹Ne me ahna amcro incrĕ ne ihkôt hĭkjĕ, quĕ ha Pahpãm pĭn mehtĭr xà jŏ kŏcti pahtÿjti ata cato, ne ajwar me hakŏ, ne me cumã axà, quĕ ha ajwar me jÿ ne me hãm pyrentu. Quĕ ha cute mehtĭrna me hŏmpun atajĕ mã me hŭpa to me hŭpa. ¹²Quĕ ha Pahpãm jarkwa to mehcahoc catĕjĕ pijakrut itajĕ me cŏjkwa pĭn jŭm jŏkre pahtÿjti ata kampa, quĕ ha me cumã hŭjarĕn to:

— Ajpĕn iwÿr me api! — hane. Quĕ ha cormã ame curĕ xwÿn itajĕ amehŏmpun kwÿa kam, quĕ ha ma ahcakra nŏ ita kam cŏjkwa wÿr me hàpir to mŏ.

¹³Me ajkaam quĕ ha pjĕ hàhcujrŏn kam tĕ, ne hàhcujrŏn to catia to cati. Na quĕ ha krĭ jĭkjĕ pot ne to hamre. Quĕ ha ikre tej, quĕha pyxit

ne hamre. Ne pjê jàhcujrôn ata quê ha mehàhtô na me to xet mir ne me hipej. Na quê ha mehkwy me hõmpu, ne me cumã hūpaa to hūpa. Na quê ha me cõjkwa jõ Pahpãm mã me catia to cati na, me cumã harẽ.
¹⁴Ne ramã cute amji na me cute me amji pupun xà kēanre ata pupun to me ipijakrut, mã ramã hamre. Ne me hõmpu he, quê ha cormã cute amji namehkên xà kēanre incrẽ pupun xà ata, quê ha cormã mehwyr cator pyrentu.

Cõjkwa kam ihtỳj me Pahpãm jarěn pejti to me ipa

¹⁵Mã Pahpãm mã memprar catê te xet ita te hõhhi cakôr, mã cõjkwa kam me hõkre ita jũjarěn xà ita te hajyr he:

— Hamre, ita caxuw Pahpãm pê me gõ Pahhiti me, ihkra pê Crixto te pjê ita cunea to mehhimpej xàa kam ri ramã hàhhuc, ne taa mã quê ha hõtpê ihmpej rohnỳtti mã — hajyr. ¹⁶Mã me pahhi te me winticwat ne Pahpãm cuna mã mehkri xà kam amehkri atajê, mehkôn krã na pjê kam me h̄yr, ne pea pjê kam ame hipô, ne ame kri, cute me Pahpãm cuna mã amji to mehkryjreprãmte ne pea Pahpãm jarěn pejti to me harěn to:

¹⁷“Me ijõ Pahhiti pê Pahpãm,
 ampeaj kam acarôt tỳj,
 pê ca mam ramã akrĩ ita na,
 cormã akrĩ rohnỳtti mã!
 Wa itỳj apejti na me garẽ.
 Ampo na?

Ca ramã ate me imã acarôt catia to ampo itajê cunea ton,
 neita kam ca ha ahimpej xà ata kam to tẽ.

¹⁸Ne me cupê me akôt me ipa catêjê nare atajê,
 ampeaj kam akam mencryc.
 Ampo na?

Hamre, ate mehcukij ne ame to kên xàa kam ri ramãhàhhuc.
 Ramã ate mehtyc catêjê cukij xàa kam ri ramã hàhhuc.
 Ne ate amã me hàpêncatêjê me,
 garkwa to mehcaçoc catêjê cunea to imej xàa kam ri ramã hàhhuc.
 Ne ca ha hanea ne me akwỳ cunea to hanea,
 ne me cati me, mehkryjreatajê mea mã,
 cute amji mã meacupa.
 Hamre, cute ame pjê to kên catêjêto,
 ate hamre xàa kam ri ramã hàhhuc!” hane.

¹⁹Mã cõjkwa kam Pahpãm to me amji kam hapac xà jũrkwa nõ xa ata jarkwa te amjijihê mên. Wa ite pĩ po te Pahpãm jãmçjên xà ata pupun, por pê Ixaher catêjê pjê kam ihkôt me to, ne ajco me hapỳ ne me to ipa

ata, Pahpämme cute me ajpĕn par xà ata na. Me ajkaam mã ihcuxê, ne me hõkre, me ta ahkrihkrit, ne pjê jàhcujrõn, ne kĕn te ta pahtýtji ata.

Cagã tepti kĕanre krã te xet jarĕn xà

12 ¹Mã cõjkwa kam rý jũ caxuw pahte me ampo pupun nare ata te amji to ipipĕ. Ata pê pyjê nõ ata. Ne pê ihkà pê pyt, ne ihpar krac ri putwrý ajĕt, ne ihkrã kam caxêre te tõi ne amji to ihkrãhkã ata ihkrã na ajĕt. ²Ne pê ramã ihkra, ne ihkra xà te ampeaj kam carãr.

³Mã hipĕr cõjkwa kam ampo ita te amji to ipipĕ ata pê nee mã ampo nare, cagãti intepti kĕanre nõ ata, ne kam ihkrã te xet, ne kam hipãr te tej. Ne ahpyãnre na ihkrã atajê na wakýre prã tepti pê ôr te ihkrãhkã atajê harij. ⁴Ne cute cõjkwa pĩn hany to caxêre jãhtõa ne hũhhyr, ne ma pjê wýr tohũcapĕr. Quê ha caxêre incrê quê ha pyxit ne to awcapĕ. Ne pea pyjê nõ ata cuna mã hàhhuc ne xa, cumã ihkra ita pým kõt mãmã, cute ihkrĕr prãnte.

Pyjê nõ ata mã ihkra pým

⁵Mã pea pyjê nõ ata mã ihkra ata pým, ne cumã hũmre, por quê ha ihpa týtji to krĩxàre cunea to ihhimpej ata. Mã ma cute me ahkrare nõata pým, cagãti pê, ne ma Pahpãm wýr me to tĕ, ihkrĩ xà kam ihkrĩ ata wýr.

⁶Mã ma cagãti te inxi to irõ, ne ahna ipipkjĕr ne apu to kĕn prãm. Mã ma inxi ata, por pê ramã Pahpãm cumã ahkĕt kam ipimxur xà toata wýr tĕ, ne curia quê ha me to ipijapar to caku to incrê ne ihkõt hĩkjê.

Cõjkwa pĩn Pahpãm jõ krãhtare me cagãti tohjĕ

⁷Jirõ pê mã ri cõjkwa kam cute me ipijapu kam mehtĕm. Pahpãm mã me hàprĕ catĕjê jõ pahhi japrý te Miquer ata me, cõjkwa kam me hàprĕ catĕjĕme, cute cagãti kĕanre ata mã me hàprĕ catĕjê me, me ajpĕn kam mehtĕm, ne ame ajpu. ⁸Ne cute me cagãti ata tohjĕ, na quê nee hipĕr cõjkwa kam cumã me hàprĕ catĕjê me, me hàhhuc nare. ⁹Ne cagã catia kĕnti ata, pê mam Xatanaj te mehcunea mã ihhĕj ata. Mã ma cute pjê wýr me to hũcapĕr, ne cute cumã me hàprĕ catĕjê tohajýar, ne ma ihkõt me to hũcapĕr par.

¹⁰Wa ite cõjkwa kam jũm jõkre týtji ata par, mã cute hũjarĕn to:

— Ita caxuw me Pahpãm te me pahkĕn pê me pahto cator! Ita caxuw ri Pahpãm te cupĕ Pahhiti na carõt to ipipĕ! Ita caxuw ri Pahpãm kra pê Crixtõte ihhimpej xà to ipipĕ. Ampo na? Por me pahkjĕjê jarĕn kĕn catĕ Pahpãm cuna mã xa, ne cute me harĕn kĕanre to caxwa ne to apĕ ata, macõjkwa pê cute me to hũcapĕr, quê ha jũ caxuw hipĕr me pajarĕn to kĕn nare. ¹¹Me pahkjĕjê te ihtýj me pahcurĕ xwýn tohjĕ. Ne nee mã amjia kõt cute me tohjĕ nare. Pê Carãcahãcre Kra pê Jeju ata caprõ jaxwý, ne me pajaxà kam ty. Cwýrjapĕ ri ihtýj me pamã ajpu, caprõ ita kõt. Mãihcãmtã

rũm me pahkjêjê atajê ihtÿj amji to mehtyc japên to me ipa. Neihtÿj amji mã me Jeju te me cumã ipijapu na me harên to ipa, na ri ihkôat cute me tohjê. ¹²Na ca cõjkwa kam me amji to ajpa atajê, ca ha me acunea me gakrya ne! Ne pjê me cõ kam amji to me ajpa atajê, ca ha me apeacre ne. Ampo na? MaXatanaj me awÿr iwrÿc, ne me akam incryc te to hipu tu ramã cumam cumã amcro incrêre na cute amji jahkre pej na ri — hajÿr.

Xatanaj ihkra xũmre caapõ

¹³Ne cagã kênti ata te ramã pjê wÿr amji to hũcapêr na amji jahkre pej, ne cute, por pyjê nõ mã ihkra xũmre pÿm ata, caapõr kam ihtêm. ¹⁴Mã cute ahkêt kam ihkrĩ xà ata wÿr ihtor xà caxuw me cumã hàcti catia jara to me ipijakrut ne me cumã hõr. Por quê ha curi amji tome ipijapar to caku to incrê ne ihkôt me to hĩkjê xà ata wÿr, cagãti ata te apu to kên cupate. ¹⁵Mã cagãti ata te harkwa pĩn cõ mã hikran. Mã ma pyjê nõ ata kôt ajpjê, cute cõ ata to, ma to ihtêm prãmte, cute ihkôt cumã hikran. ¹⁶Mã ihtÿj pjê te pyjê nõ ata tehcajpar, ne cõ mã harkjêc. Mã harkwa mã cagãti te cõ kujahêc ata xàr, mã cute intête ihkrêr. ¹⁷Mã cagãti ata apu pyjê nõ ata kam incryac to incryc, ne ma tẽ, ne cute pyjê kwÿ pê mehtãmxwÿa atajê kwÿ to kên kam ihtêm. Por me Pahpãm jarkwa kampa, ne catyt kam Jeju kôt me ipa atajê tori apu hane. ¹⁸Ne ma cagãti ita tẽ ne cõxwa tohkà na hàhhuc ne nõ.

Hũmre kêanre nõ ata pê ampo jãprêa pyrãc

13 ¹Jirô pê mã, wa ite cagãti wÿr ampo kênti nõ ata te cõxwa pĩn hàpir na hõmpun. Nepê ihkrã xet, ne kam hĩpàr tej, ne ahpÿanre na hĩpàr itajê na cumã ihkrãhkà, ne ihkrã na ihcakôc xàhêj xi kêanre na ihkàhhôc ata ajê, nehũjarên to: “Ipê Me Apãm Cati” hane. Cute ihkàhhôc kam ihcakôc xà kêanre ita to apu Pahpãm to kên prãmte. ²Ne por ite ampo kênti pupun ata pê ihhêj rũm rop cahàc krorti, ne ihpar pê ihhêj rũm awcapãtkôkrit jũhkrahti, ne harkwa pê rop cahàcti jõkre hõhti jarkwa. Mã cagãti kêanre ata te cumã hàpên xà caxuw carôt catia ne hõr. Ne cute cumã cupê pahhi krĩ xà ata jahkre, ne harkwa kôt cute hàpên na mên. ³Ne pê ampo kênti ita krã nõ pyxit ne cupê ihhêj rũm haxôp te ihcuran, ne pê ihkên xà te ihcuran xà ata ramã cumã hà nõ, mã hacpÿa mã ramãihtĩr. Mã pjê cunea kam hãn ne ame amji mã ame ipikrar to me ipa, ne cute me ampo kênti ata pynãr, ne ihkôat me amji ton to me ipa. ⁴Ne mehcunea ame cagãti kêanre ata kĩn, ne me cumã ihcakôc to kênre nare. Ampo na? Pê ampo kênti ata mãcarôt to cute hàpên xà cunea gõ, na pê. Ne hanea ne ame ampo kênti ata kĩn, ne me ajpên mã me to ihcakôc to impejti to hane he: — Jũm pê mã ampoti ita pyrãac, ne cume ipipêan? Ne jũm ri ampeaj kam ihhihtÿj, cute me ajpên cujtên xà na? Hamreare! Jũm me quê amji cujtê! — hane.

⁵Ne cute me hũmre mã ampo jahkre kêatre ton xà ata na amji na hũpar, ne hanea ne cute Pahpãm na ihcakôc kêanre xà na amji na hũpar, ne taa mã quê ha ihhimpej to caku to incrê ne ihkôt hĩkjê. ⁶Mã cute Pahpãm cuna mã ihcakôc kêanre, haprÿ mea mã, ne hanea ne curi Pahpãm krĩ xà ata mea mã ahna ihcakôc, ne hanea ne ihkôtçôjkwa kam amehkrĩ atajê cunea na apu ihcakôc kêanre. ⁷Ne cute Pahpãm na mehkwy cunea me apu ajpu, ne cute me hirô pê ihcuhê na amji caxuw hũpar. Ne hanea ne cute ampo kra me, krĩxàre cunea me, me harkwa pihho catêjê atajê cunea to ihhimpej xà caxuw, cute amji na hũpar. ⁸Ne por mehcunea pjê kam me amji to me ajpa atajê cunea, quê ha ampo kênti ata kôt me amji kampa, ne toa amji mã mehhimpej. Ne por hacpÿa mãmehfir xà jô kàhhôc kam me haprÿ hikwa atajê ri, nee ihkôt me amji kam hapac nare. Ampo na? He pê Pahpãm pjê ton pêa mã cute me Caràcahàre Kra curan na to amji kampa ata to ri amji mãmehhimpej to me ipa. Cwÿrjapê ri cute amji mã hō kàhhôc kam me haprÿ nōr.

⁹Cwÿrjapê ca me ipar peaj ne, me gũpar mã ate me hamãr pàràpên. ¹⁰Por jũm jaxàr xà caxuw apu mō ata, quê ha ihtÿj me haxà, ne por jũm apu wapo xwahhihti te ihcuran xà caxuw apu mō ata, quê ha ihtÿj wapoxwahhihti to mehcura. Ne pom ampo itajê, me cupê Pahpãm na mehkwy caxuaw ri, ne quê ha ihtÿj me cumã awcanã, ne Pahpãm to amji mã mehhimpej kam me to incrã tu ne.

Mã hũmre nōa pê ampo jàprêhti pyrãc ata cator

¹¹Ne ite pjê pĩn ampo kênti itajê nōa jàpir na hōmpun. Mã kam hĩpàr pê carà cahãcti hōhtia jĩpàr ne ipijakrut. Ne cama cagãti kêanre ata cakôc xà me ipipëan. ¹²Ne mam cagãti kêanre ata carôat to, kam mare mã hàpên to ipa. Ne pjê kam mehcunea amehkrĩ atajê mã cute mam ampo kênti ata kĩn na, incryac kam hũjahkre. Por ajmãr cute wapo xwahhihti tomehcuran, mã hacpÿa mã cutea amji caprãr ne impej ata kĩn, na ri incryac kam me cumã awjahkre. ¹³Ata te ri me hũmre kam mare mã ampo pihhoti catia ton. Ne cute çôjkwa pĩncuhy ton, ne pjê wÿr ihkujahêc, mã pjê kam ihpÿm. Mã me hũmre cunea te me hōmpun. ¹⁴Mã hapu na ampo kênti cator ita te ri pjê kam me hũmre itajê cunea mã ihhêj. Mã Pahpãm te cama cute mam ampo kênti ata carôat to ampo ton xà na hamãr, mã cute ton, ata to ri cute me hũmre cunea mã ihhêj. Ne cute pjê cunea kam mehcunea mã harkwa to:

— Ca ha cute wapo xwahhihti to ajmãr me ampo kênti curan ita krekà to me amjimã ahimpej, ate amji mã mehkĩn prãmte — hajÿr. ¹⁵Mã cute me ton, mã pom hapu na ampo kênti ita te ampo kênti krekà ata jakôr, mã pea ihcakôc, ne cumã mehkĩn ne me hũpa nare atajê cunea jipej xà caxuw amji na hũpar.

Ampo kênti ata me hàhtôa kam haprÿ nō

¹⁶Ne pea cute me hũmre kà me, me ahkrare me, me hakràj me, me cupê hamreare me, cama me cumã me hàpên catêjê me, amjia kôt me

hàpêncatêjê mã harkwa, mãr quê amji kam awpôc rûmamji jûhkra kam me haprÿ nŏ, nare, quê ha mehkcütÿj kam me cunŏ. ¹⁷Ne cute me to hajÿr xà ata kam, quê nee jûm kuctÿj kam ampo kênti japrÿnare ata mã me ampo to hàhpan nare, ihpore na. Ne nee me cupê ampo japrŏr nare, ihpore to. ¹⁸Ne haprÿ cahyt xà te hajÿr he: “666”. Ca ha ate akrã krea te amji jahkre pejti na, ca ha atÿj kampa.

Por 144 mir atajê Pahpãm pej na me harên

14 ¹Jirô pê mã wa irît, ne ite Caràcahàcre Kra pê Jeju ata te Xijãw jŏ hàpkàjti na hãm na hŏmpun. Mã cahê na cute me 144 mir ne mehcuhhê. Mã mehkcütÿj kam me Jeju haprÿa hikwa, ne me kam Hûm Cati japrÿ. ²Wa ite cŏjkwa pîn me hŏkre ata par, mã ihhêj rûm cupê cŏhxocti jàhkrihkrit, ne hàwrãrãc ita pê ihhêj rûm pahhàjê jãwrãrãc, wa ite impar. Mã hŏkre pê ihhêj rûm wakÿre japàre ita jŏkre par. ³Mã Pahpãm krî xà pu na cute me cwat atajê me, pahhi te me winticwat atajê me, cute mehkrã ne me to xa. Mã me cuna mã cute me 144 mir atajê me xa. Ne mençrer xà intuw ata to me cre, ne jû wÿr quê pjê pê cute mejûm pytãr nare ata me iràn xà na increr atajahkre pej ne to cre. ⁴Ne por me xa atajê te amji kam me hapac xà peaj to impej, ne nee rÿ jû caxuw pyjê na amehûhkra nare. Quê ha jû kam Caràcahàcre Kra ata mŏr prãm, quê ha ma ihkôt me mŏ atajê pê me hûmre cahhur na me hûtã. Ampo na? He me taa mã pê mam Pahpãm me Caràcahàcre Kra ata mã me amji gŏ. ⁵Ne jû caxuw mehnŏ te ihhêj xi xà nŏ ton nare. Ne nee ampo pyxitre na mehnŏ kên nare, ne mempeaj to mempej.

Quê ha Pahpãm me cupê hŏ tekjê nare atajê to hamre

⁶Wa ite Pahpãm mã imprar catêjê nŏa tor, ne kÿj pê ihtêm na hŏmpun. Mã cute pjê kam ampokra me, me harkwa pihho me, ampo krîxàre cunea mã, ihkrãhhia kam Jeju pê me pahkritxwÿ na harên xà impejti to hûjarên to ihtêm na, ite hŏmpun. ⁷Mã cute me cumã hûjarên to hajÿr he:

— Imã me amã ampo pej rohnÿtti mã ata jarên xà ata pê nee mã ampo nare. Caamji mã me Pahpãm cupa, ne catihti na amji mã me harê! Nãmri cute pjê kam me hûmre cunea cukij xà ne me to ipicokjêr jŏ amcroa kam ramã hàhhuc. Ca ha, por cutecŏjkwa me, pjê me, cŏxwa me, hatuj xà cunea ton catê ata, ca ha to me hàmnãn prãmte me acakôc to impejti, ne me amã ihkînti ne — hajÿr.

⁸Mã ihkôt mare mã ihtor ita te hanea ne hûjarên to:

— Ma krî catia japrÿ te Papirŏn jŏ krî ata pÿm ne hamre. Ampo na? Por pê curi mehkrîatajê pê mehkeãre, ne ajco pjê cunea kam mehkwy mã ampo to hahkre to hane he: “Hacme ne ahti na ame pyjê kwÿ caxu” hane. Ata pê ihhêj rûm cutemehkwÿ mã cŏxÿhti jŏr, ne amehkwÿ to ipipãn pyrãac. Ne me caxun ita pê ihhêj rûm cute me cŏxÿhti xen, ne

ampeaj kam ahti na me cumã me cahãj caxun prãm. Cwÿrjapê ri Pahpãm te me hŏ krĭ mea mã me tohamre tu — hajÿr.

⁹⁻¹⁰Ne pom hapu na ipijakrut kôt ihtor ita te ri ihkrãhhia kam hũjarĕn to:
— Por jũmjê apu ampo kĕnti me, ihkrekà kĭn, mãcute mehkuctÿj kam haprÿ nŏr, nare, cute mehũhkra kam haprÿ nŏr atajê, quê ha Pahpãm te ame kam incryc xà pê ihhêj rũmcôxÿhti ata to amehkôm. Por mehcunea te ame ita ton atajê, quê ha mehkàj xà atajê uu ne cuhy te kĕn to ihprà ata kam me cumã hamre nare. Nekĕn cacro ata, quê ha ihtÿj Pahpãm mã memprar catêjê me, Caracahàcre Kra ata kam mare mã mehkà to caxàr to ihcuhhê. ¹¹Ne pom quê ha cuhy ame cumã ihkàj xà to ita kũm, quê ha ihtÿj hŏtpê ma hàpir to ipa rohnÿtti mã. Quê ha cute ame ampo kĕnti me, ihkrekà kĭn itajêmã, jũ caxuw caxwa me amcro kam mehkàj xà itajê amji to ihpec nare. Ne hanea ne, por cute mehkuctÿj kam ame haprÿ nŏr atajê cunea mã, quê ha ita hane — hajÿr.

Pahpãm na mehkwy ihtÿj me amji pupun xà kêanre kam ame ipa

¹²Quê ha Pahpãm na mehkwy me, por me harkwa kampa, ne ampeaj kam Jeju to amji mã mehhimpej atajê, quê ha ihtÿj me curê xwÿn te ame to kêanre ata jãhpan xà na, mehkĕn mã me hàr name to amji japackre. Ne quê ha ihtÿj me awcanã, ne cormã Pahpãm me Jeju kŏat me amji ton to me ipa.

¹³Wa pea ite cŏjkwa pĭn jũm jŏkre ita par, mã hũjarĕn to:

— Ita na ca mehhŏc he: “Pom quê ha cormã Pahhiti jãpĕn xà kam ame ty atajê quê ha ame hakry” — hajÿr. Mã Pahpãm Carŏ Pejti te me cumã hũjarĕn to:

— Ýhÿ, ita ampeaj kam ri. Hamre. Ita caxuw, quê ha ihtÿj me hàpĕn catêjê atajê ame kôt. Ampo na? Ramã me hàpĕn xà ita kôt me cumã ampo cunea — hajÿr.

Quê ha Pahpãm mehkwy to cuprŏ ne amji mã me huwahi

¹⁴Wa irĭt, ne ite jũm pê me Pahhàkà cati pyrãcti, ne wakÿre prà tepti pê ôr te ihkrãhkà ne ihkrã na ajĕt ata pupun. Mã cute hũhkra to rŏhkrÿt xwahhi pyrne ahcacrã jakati kam to jÿ. ¹⁵Mã pea Pahpãm mã memprar catêjê nŏ Pahpãm to amji kam hapac xà jũrkwa pĭn cator, ne cute kÿj cati pĕa mã ahcacrã jakati kam jÿ ata mã carãrto:

— Gŏ rŏhkrÿt to, pjê kam, me hũmre pê ihhêj rũm pur kam ramã ampo teptu, neramã ihkĕhkĕn xàa na atajê, ca ha to hakep — hajÿr.

¹⁶Jirŏ pê mã ri, por ahcacrã kam jÿ ata te pjê na hŏ rŏhkrÿt to ihtĕm, ne cute to ampo cunea jakep xà atajê jakep partu.

Quê ha Pahpãm cute mehkĕn ton atajê to pĭxŏ ne me hatê

¹⁷Wa ite cŏjkwa kam Pahpãm to amji kam me hapac xà jũrkwa pĭn harkwa na imprar catê nŏ cator na hŏmpun, mã cator, ne hanea ne cumã

hõ rõhkrýt xwahhihti. ¹⁸Jirô pê mã wa ite Pahpãm mã imprar catê cuhy toamji pytâr ata te Pahpãm jûrkwa pê cator na hõmpun. Ne cute ihnõ mã rõhkrýt ata mã kýt cati pêa mã carâr to:

— Ramã pîxô pê uwa itajê cunea inteptu, gõ rõhkrýt to pjê kam pîxô atajê cunea jakep partu — hajÿr. ¹⁹Mã cute pjê na hõ rõhkrýt to ihtẽm, ne cute to pîxô atajê cunea jakep partu, ipâr pê. Ne cute Pahpãm te incryc to hipu xà pêihhêj rûm kwÿr jatên xà ata kam haxwÿr. ²⁰Ne pê Pahpãm jõ kwÿr jatên xà ata krî pê ampÿa mã xa. Ne pê Pahpãm te incryc tohipu xà kam me pîxô jatên kam me tê, ne pê pîxô cacô ata pê me caprõne ajxwÿ. Ne ihtua to ihtu. Ne kàj mã ihtu na me pajara capô pyxít. Ne mõi jüwry to cute 300 quirom.

Cute me pahcurê xwÿn carõ kên tohjê atajê Pahpãm to amji mãme amnä

15 ¹Ne hanea ne irît, ne ite cõjkwa kam ampo catia cupahti ata pupun, ne ite amji mã:

— Pÿhàpã ampo mã ajte? — hajÿr. He nee mã ampo nare, Pahpãm mã memprar catêjê te xet atajê te Pahpãm te pjê kam ame to kên xà atajê to me amji tÿj, ne me to xa. Atajê pê ri Pahpãm te amekam incryc xà cahhur kêanre atajê.

²Ne pea ite wit pê cô catia pyrãcti me cuhy picacwÿr ata pupun. Ne hanea ne ite, por cute me cagãti kêanre ata me, carõ krekã atajê me, ampo kënti te me hûmrekam hapry nõr atajê tohjê catêjê pupun, mã me xa. Por wit pê cô catia pyrãctiata cahê na ri me xa. Ne ame wakÿre japãre atajê cakõ, por Pahpãm te me cumã hõr atajê. ³Pê Mojxe xwÿ Pahpãm te mehkên pê meto cator xà na increr to ihkõt me ipacatêjê mã hahkre. Pê hanea ne Carãcahãcre Kra pê Jeju ata Pahpãm te mehkên pê me to cator xà na mehkÿwÿ mã increr to hahkre. Mã me to increr to:

“Me ijõ Inxü Cati pê Pahhiti ata,
 ampeaj kam acarõt tÿj,
 ne ampeaj kam gãpên xà itajê catyt kam ne impej.
 Ne apê pjê cunea kam ampo krîxãrecunea jõ Pahhiti,
 ne ate amji mã ahimpej xà atajê,
 ampeaj kam ihcuhtac, ne ampeaj kam ri!

⁴Ne jûm quê amji mã acupa nare?

Wa me icunea amji mã me acupa.

Ne jûm quêacati na amji mã garên nare?

Wa me icunea acati na amji mã me garên to me ipa.

Ampo na?

Quêt apyxít peaj ne apê ajteare mã,
 ne apeaj to apej,

ne nee akam ampo kên hamreare.

Quê ha krĩxàre cunea awỳr me apkjê ne me cumã akĩn,
 por ca mehcunea kam mare mã ampo to gâpên xà cunea cuhtactiitajê
 to,
 mã me hõmpu,
 na ri me awỳr me apkjê ne me cumã akĩn” hane.

Pahpãm mã memprar catêjê ampo kên te xet ne me to cator

⁵Jirô pê mã, wa ite cõjkwa kam Pahpãm to me amji kam hapac xà jũrkwa te amji jihê mên na hõmpun, mã ampo kà te Pahpãm jũrkwa caxwỳn ataxa. ⁶Mã Pahpãm mã memprar catêjê te xet atajê te ampo kên te xet atajê to me cator, Pahpãm to me amji kamhapac xà jũrkwa pĩn. Ne cupêhkà jakati pràti atajê to pit mã cute amehkà, ne wakỳre prà tepti pê ôr ata te ri amehcahti na hê, mã ame to ihcuhhê. ⁷Mã ampo tĩr te cwat ne Pahpãm pu na mehcuhhê atajê nõ te Pahpãm mã memprar catêjê te xet atajê mã wakỳre pràti pê ôr te cratti atajê jõr. Mã kam Pahpãm te ame kam incryc xà te hipu partu, por Pahpãm tĩr rohnỳtti mã ata cryc te ri to hipu. ⁸Mã cute Pahpãm to me amji kam hapac xà jũrkwa ata kam, Pahpãm carôt jàhcujrohtikam ihkũmti ata te to hipu tu, ne jũ wỳr qué cormãne jũm cumã axà. Quê ha xa Pahpãm mã memprar catêjê te xet atajê ampo kên itajê to ame hamre, quê ha ihtỳj jũm cormã cumã axà.

16 ¹Jirô pê mã, wa ite cute Pahpãm to amji kam me hapac xà jũrkwa pĩn, Pahpãm mã memprar catêjê te xetatajê mã, jũm jõkre tỳjti jũjarên xà te hajỳr ata na impar:

— Ca ha pjê kam me Pahpãm cryc te cratti te xet to hipu atajê jaxwỳr to mō — hajỳr.

Mam ampo kêanre ata pê ri mehxêt kêanre

²Mã mam cati mã ita te pjê kam cratti pê Pahpãm te ame kam incryc ata jaxwỳr. Mã mehxêt kêanre te, por cute ame amji mã me ampo kênti me, ihkreka jũpa ne to cati, mã cute me kamhaprỳ nõ atajê kam ihtêm, ne me cumã hàà to hà.

Hapu na ampo kên ata pê ri cõxwa te me caprô na amji ton

³Mã hapu na ita te cõxwa kam cratti pê Pahpãm te ame kam incryc ata jaxwỳr. Mã hamrecõxwa te me caprô na amji ton ita pê ihhêj rũm jũm tyc caprô, ne pea cute cõ kam ampo tĩr atajê cunea jipej.

Ampo kên crê ita te ri cõ jatuj xà te caprô na amji ton

⁴Mã incrê ita te cõ jatuj xàa kam cratti pê Pahpãm te ame kam incrycata jaxwỳr. Mã pea cõ te me caprô na amji ton. ⁵Ne ite, por Pahpãm mã imprar catê te cõ to amji pytàr ata te hũjarên xà te hajỳr na impar he:

— Apyxit peaj ne me hirôa pê apej! Caa pê ca mam akrî, ne cormã akrî rohnýtta mã. Ne catyt kam ate mehçukij xà caxuw apeaj to apej. ⁶Ampo na? Cute me akwÿ caprô jaxwÿr, ne hanea ne me cumã garkwa to mehçakôccatêjê caprô jaxwÿr, cwÿrjapê quê ha hahpan xà na ihtÿj me caprôa to me ikô, naca ate me cumã me caprô ita jôr, quê ha ihtÿj me to ikô — hajÿr na, ite impar.

⁷Ne pea ite Pahpãm mã ampo kûm cuxwati to caxàr xà ata pîn, jûm jôkre jûjarên xà te hajÿr ita par, mã cute hûjarên to:

— Me ijô Inxû Cati pê Pahhiti ata, ampeaj kam quêt acarôt tÿj. Ca ate amehçukij ne me to ipicokjêr xà ita caxuw, acaxwãm catia mã apej ne acuhtacti, ne ampeaj kam riapeaj to apej — hajÿr.

Ampo kên te cwat ata pê ri pyt cacro te me to caxàr xà

⁸Jirô pê mã ri cute cwat ita te pyt kam cratti pê Pahpãm te ame kam incryc ata jaxwÿr, ne cumã cuhy to cute me hûmre to caxàr na hûjahkre. ⁹Mã cuhy te me to caxàr, mã cute ame Pahpãm japyr to ihçakôc to kêanre to me hajÿr he:

— Akêanre! Nãmhã, ne me ito kên ita jicu! — hajÿr. Ne nee cute amehkên itajê jicu nare, ne nee Pahpãm catihti ata to cumã mehçakôc nare.

Ampo kên te xïc ata pê ri awcapàtkô me, me kàj xà

¹⁰Mã cute xïc ita te ampo kênti krî xà ata kam cratti pê Pahpãm te ame kam incryc ata jaxwÿr. Mã ampo kênti te ihhimpej xà atajê cunea kam awcapàtkô, na ri curi mehkrî catêjê cunea kàj xà. Mã tee mehkàj xàhte ame ahkà cãmxa, por me haxôp atajê xàhte. ¹¹Ne ame còjkwa jô Pahpãm mãn to kêanre, ne nee ajte cormã cute me hõ pry kên ata jicu nare ajte.

Ampo kên te xêj ata pê ri me ipijapu xà catia

¹²Jirô pê mã ri cute xêj ita te còhti japyr te Cômpejti ata kam crattipê Pahpãm te ame kam incryc ata jaxwÿr. Mã pea cô ata crà, ne ihçajpuw pry nô, ihkôt pyt japôj xà pîn pahhi catêjê te me ipa, ne me hapôj xà na. ¹³Wa ite ampo carô kên crê pê pôrti pyràcti, tûmti, kêanre atajê japôj na hõmpun. Mã pyxit ne cagãti ata jarkwa pîn cator, ne hanea neampo kênti ata jarkwa pîn pyxit ne cator, ne hanea ne cagãti jarkwa kôt mehhêj xi to mehçakôc catê ata jarkwa pîn pyxit ne cator. ¹⁴Ne ampo carô kên pê pôrti atajê pê jû caxuw jûm xûmre te ampo pihhoti pupun nareatajê ton catêjê, ne ihtÿj to me higêc rê. Ne pom ampo carô kên atajê pjê cunea kôt amehçahkûm, pahhi catêjê kôt, cute me to cuprônprãmte. Mã hàhtôa ne cute me cuprôn, Pahpãm pê Pahhiti carôt tÿjti ata cuna mã me ipijapu prãmte, hõ amcro ata kam.

Pahpãm na mehkwy ihtÿj Jeju cator jikaj xà me cuprô

¹⁵ÿhÿ me ikwÿ, he pê Jeju me pamã amji cawpa to hane he:

— Me ikampa he, wa ha ajpên me awÿr itēm xà ita to ihhêj rŭm me hàhkij xi prar xà! Ne por quē ha me ikampa atajê, me iriat na ame ipa. Quē ha mehkà to me amji cŭmpej hiahpuro ne me hakryti to me ipa. Ampo na? Quē ha nee me hàhtôti atajê kam mare mã amehcakrô naamehpahàmti to me ipa nare — hane.

¹⁶Jirô pê mã ri ampo carô kên crê pê pôrti pyrác atajê te me cupê pahhi catêjêcunea to cuprôn, por Epew catêjê jarkwa na pjê japyrÿ teMequit jô kên ata ri.

Ampo kên te xet ata pê ri pjê jàhcujrôn catia

¹⁷Mã cute xet ita te cratti pê Pahpâm te ame kam incryc ata jaxwÿr, kÿj pê. Mã pea Pahpâm to me amji kam hapac xà jŭrkwa kam ihkrĭ xà atapĭn, jŭm jôkre tÿjti ata te hŭjarēn to:

— Ramã cute amji jipêj! — hajÿr.

¹⁸Mã ihcuxê, ne me hŏkre, ne hàhkrihkrit jàwrārāc, ne pjê jàhcujrôn catia to cati ata, por rÿ jŭ caxuw jŭm te pjê jàhcujrôn kēanre pupun nare ata. Ne mam ihkwÿ atajê jirôa pê ihkēanre. ¹⁹Ne por krĭ catia ata te amji cahhêc to incrê, mã pjê cunea kam krĭ atajê cunea jamre. Mã Pahpâm te Papirôn jô krĭ kēanre kam, cuteincryac to incryc na amji to amji japackre. Ne cute krĭ kam incryc jàprēhti ata mēn. ²⁰Mã cŏ jipôc ri amcrà atajê cunea jamre. Ne hanea ne hàhkà jakôtti atajê cunea jamre. ²¹Mã ta te amji to kên ne me hŭmre kam apu ipijaxwÿr, ne cute ame to kēanre, ne ta te kên atajê pytĭ na cute cwarēnta quir. Mã pjê kam me hŭmre itajê cunea ame Pahpâm mân kēanre, pê kên te taita ame to kēanre, na pê.

Cute Pahpâm pynār nare atajê pê cahāj xyre kēanre ata pyrác

17 ¹Mã pea Pahpâm mã memprar catêjê te xet te cratti te xet cwÿr atajê nŏ ajpên iwÿr mŏ, ne cute imã hŭjarēn to:

— Ajpên iwÿr mŏ, wa amã cute krĭ cati kēanre ata to cute amehkên xà ata jahkre, ne amã harê. Ýhÿ, por cŏ jàhtŏa cote na, krĭ catia xa ata pê ihhêj rŭm pyjê nŏ inxyre kēanre pê impjê nare ata pyrác. ²Mã pjê cunea kam krĭ jo pahhi catêjê cunea hÿrmã me pra, cute amji mã ame ampo kĭnti atajê wÿr. Ne cute me ampo kĭnti atajê pê ihhêjrŭm jŭm cahāj xyre ata pyrác. Mã pjê cunea pĭn me hÿrmã me pra, ne kam ame ipa ata pê ri ihhêj rŭm cuteame cŏ xÿhti xen catêjê te cŏ xÿhti to pit mã ame amji japackre — hajÿr.

³Mã pea Pahpâm Carô Pejti te imã amji jŏr, mã ma ahkêt wÿr harkwa na imprar catê te ijaprôr ne ito mŏ. Ne curia wa ite pyjê inxyre nŏ ata teampo kēnti intepti ata kam hÿr na hŏmpun. Mã ampo kēnti ata kam, cute me cumã haprÿkēanre pyxwÿr atajê na ihhŏc. Ne pê ampo kēnti ata kam ihkrā xet, ne kam hĭpār tej. ⁴Pê hanea ne cahāj xyre kà ata inteap to intep, ne hakrô xà itajê to pê amji jakrô ne kam jÿ he. Wakÿre prà tepti

pê ôr ata me, kĕn prà tepti na hĭ jàhwÿrti atame, ampo prà pê kĕn prà pyrãcti ata me, pê to amji jakrô ne kam jÿ. Ne pê hũhkra kam wakÿre pràti pê ôr te ihkôm xà kam me hàhtôa te me to inxÿ xà tũm kêanre ata juwahi ne to jÿ, pom pê ajco mehcunea ajco me caxu ata to pê jÿ. ⁵Ne ihkuctÿj kam cute amji jarĕn xà na, ihhóc ata harĕn to:

— Ijaprỳ pê Papirôn jô krĭ catihti ata, ne ipê pjê kam pyjê inxyre catêjê me, ahti na me hũmrea te ame amji to inxy catêjê menxi — hajÿr. ⁶Wa ite pyjê nõ ata pupun, mã cute Pahpãm na mehkwỳ me, por pê ampeaj kam Jeju kôt me amji ton to me ipa, pê ajco mehcura atajê caprô tocute amji to ipipãn tu. Wa ite hõmpun, mã cute imã ipikrar ne ijigĕc hyr.

Pjê to mehhimpej catêjê pê ampo jàprê kêanre ata pyrãc

⁷Mã Pahpãm mã memprar catê ata te icukij ne imã:

— Ampo na mã cute amã ipikrar ne gigĕc hyr, ca hũpate apu ato cara? Apu amji mã pa nare, wa ha amã cahãj ata me, ampo kĕnti kam ihkrã te xet ne kamhĩpãr te tej ata, wa ha amã kôt harĕn to imej. ⁸Ne pom ca ampo kĕnti pupu ita, ihtĩar cormã, ne nee quĕ ha cama ihtĩr ata na ahtũm ry nare, quĕ ha hamre. Quĕ ha kreti jatõhhy nare ata pĩncator pê, quĕ ha Pahpãm to hamre. Ne por mehcunea te ampo kĕnti cator na me hõmpun ata te me cumã ipikrar, mã hũpate amento cara. Ampo na? Pĕmam ampo kĕnti ata ihtĩar na apu ipa, ne ajte krã ihtyc, ne quĕ ha jũ caxuw hacpyã mã ihtĩr ne cato. Ne por mam, pjê jamre reria mã Pahpãm te amji mã hacpyãmã mehtĩr xà jô kàhhóc ata kam ramã me haprỳ nõr atajê ri, nee apu amji mã me hũpa nare. Ne mehkĩnte ihkàhhóc kam me haprỳ hikwa nare atajê, quĕ ha ampo kĕnti ata pupu, ne me cumã hũpaa to hũpa.

⁹— Ne pom ite harĕn xà itajê, jũm krã kre te amji jahkre pejti quĕ ha ihtÿj kampa, ne hahkre pej. Pom ampo kĕnti krã te xet itajê pê, por hàhkà jakõtti te xet mãkam pyjê nõ jÿ ata pyrãac. Ne hanea ne cupê pahhi te xet atajê pyrãac. ¹⁰Ne ramã cute xĩc ne hamre, ne cormã pyxit ne ihhimpej, ne nee cormãihnõ ata cator nare. Ne pom quĕ ha cormã pahhi cato ita, quĕ ha cato ne nee ahna ahtũm ry nare, quĕ ha hamre. ¹¹Ne pom mam ramã ampo kĕnti cator, ne ramã hamre ata te ri ihkwÿ itajê to õjtõ, ne taa mã quĕ hapu na ihkwÿ te xet itajê to ihhimpej, quĕ ha ihtÿj hamre.

¹²— Ne por hĩpãr te tej, ca ate hõmpun atajê pê ihhĕj rũm pahhi te tej, ne nee rÿcute mehhimpej kam ihtĕm nare. Na quĕ ha cormã cute ampo kĕnti cahê namehhimpej to me amcro pyxit xà caxuw amji na me awpa.

¹³Ne mehcunea te ramã me amji par, quĕ ha ihtÿj me ampo kĕnti ata mã cute me amji jahkre pej atajê gõ, ne hanea ne cumã me carõt gõ. ¹⁴Ne quĕ ha ihtÿj Caràcahàcre Kra ata me, me amji cujtê, ne me ajpu, quĕha pea Caràcahàcre Kra ita ihtÿj me hirô pê xa, ne me tojhê. Ampo na? Cupê me hũmre jô Pahhiti, ne cupê pahhi cunea jô Pahhiti na ri. Ne por Pahpãm

te amjimã me capi, mã ihkôat me amji kam hapac to me ipa atajê me, quê ha ampo kênti ata ajpu, ne pea me hirô pê xa, ne me tohjê — hajÿr.

¹⁵Ne hipêr Pahpãm mã memprar catê te imã:

— Ne pom ca ate cô jãhtôa pupun, mã cahê na jũm cahãj xyre jÿ atajê pê pjê cunea kam ampo kra me, krĩxàre me, me harkwa pihho catêjê.

¹⁶Ne pom ca ate ampo kênti me, hĩpàr te tej pupun atajê, quê ha ma ame cahãj xyre ata caca, ne ame curê. Ne cupê cute ampo kĩn xà to amjijakrô atajê cunea to cupê ihpôj partu, ne mehcakrô to tojnô quê ha jÿ. Jirô pê mã quê ha ihtÿj me jũm xyre ata jĩ ku, ne pea cuhy to me tocapa, ne me to acto, quê ha hamre. ¹⁷Ampo na? Pahpãm te aracri pahhi atajê mã caxwãm pê me cumã me cute me to jũ mãn xà atajê jôr, ne hanea ne cute caxuw me cumã carôtjôr. Ne hanea ne ampo kênti te me to ihhimpej xà caxuw cute cumã carôt jôr, mã ampo kênti ita ihtÿj cahãj ata to apu ihkêanre toipa, Pahpãm te ahna harkwa hyr xà na. ¹⁸Ne pom ca ate cahãj xyre pupun ita pê krĩ catia ata pyrãc, mã cute amji wÿr pjê cunea jô pahhi to cuprôn, ne taa me to ihhimpej ata — hajÿr.

Cute Pahpãm pynãr nare atajê, quê ha me hamre

18 ¹Jirô pê mã wa ite côjkwa pĩn Pahpãm jarkwa na memprar catê nô pupun, mã ajpên ahpar mã tẽ. Por Pahpãm carôt tÿjti ata jarkwakôt, ajpên ahpar mã tẽ. Ne ampeaj kam ihprà, ne ihprà jãhcujro ita te pjê cunea kujro. ²Mã kÿj cati pëa mã cute caràr to:

— Papirôn jô krĩ catia ata pÿm! Ne ita caxuw quê ha mepahcurê xwÿn pit kam apu ipa, ampo carô kên tũmti atajê me. Quê ha ihtÿj xônti me, ampo jara kêanre, kĩn nare atajê me, quê ha hanea ne kam amji to ajpa. ³Ampo na? Cute me hũmre cunea mã hõ côxÿhti jôr, ne ihtÿj hõ côxÿhti ita na mehwÿ mã quêt to ipa, ita pê ihhêj rũm cute me cahãj xyre to amenxyto ame ipa pyrãac. Mã pjê jô pahhi catêjê cunea te ramã amehcaxun par, mãcute ame ampo to ihpore na hàhpan catêjê cunea te amehcaxun xà ita jahpan xàna, ramã amji to ame hakràj par — hajÿr.

⁴Ne hanea ne ite côjkwa pĩn jũm jôkre ita par, mã cute hũjarên to:

“Me ikwÿ, krĩ ita pê me acato,
cupê me acato!

Nee ca cuxà ame ampo kên itajê kwÿ ton nare.

Ne nee ca ihkên ita mã ihkôt me axàr nare!

⁵Ampo na?

He ihkên ita ramã amji jipy hakôat to hakôt,
ne ramã cute côjkwa huctu.

Ne Pahpãm ihtÿj cute ihkên ton xà ata to amji japackre.

⁶Ne cute me amã ampo kêanre jôr atajê jahpan xà na hacpÿa mã,
me cumãme ampo kêanre atajêa gô.

Ne cute me amã ampo kêanre ton atajê jahpan xà na,
 ca ha me cumã gãmjôr to catia to ajkrut.
 Ne cute me ato kên prãmte ihkôm xà kam me amã côxÿhti to hipu
 jahpan xà na,
 ca ha ihkôm xà ata kam me cumã to hipu to ajkrut,
 cute me amã ihkôm xà kam ton atajê jirôa pê hacpÿ mã me cumã to.
 7 Me cumã amji kîn nare to,
 ne hanea ne me cumã ihkên xà kêanre to, ne me cumã agô.
 Ampo na?
 Pê ramã taa amji mã ampo pejti jãhtôa ne cugô.
 Atajê kôt ri mehcunea ramã amji mã hakràj cati na me harê.
 Mã taa amji to hàmnãn to:

“ Wa ipê pahhikwÿj ne ijÿr xà ita kam jÿ!
 Ne nee mã ipijapit nare,
 ne nee waha jÿ caxuw amji na ihkên xà nō pupun nare’ hane.
 8 Cwÿrjapê quê ha amcro nō pyxit,
 quê ha hÿrmã ampo kên kwÿ cato,
 ne apu to kêanre ne.
 Quê ha cumã ampo hà,
 quê ha ihtÿj ihkàj xà na amjipupu,
 ne ampeaj kam cumã prãm.
 Quê ha cama cuhy kam me to capa.
 Ampo na?
 Pom me pajô Pahpãm pê Pahhiti carôt tÿjti ata quê ha ihcukij ne apu
 to kêanre ne” hajÿr.

Pjê kam me hakràj jamre japête ri ame amrã

9 Ne pjê jô pahhi catêjê atajê te ame cahãj xyre to amenxy atajê me,
 menxÿ xà kêanre atajê, quê ha krī pê me cahãj xyre pyrãc ata kam
 cuhykũm pupu, ne ihtÿj ame caràr ne ame amrã. 10 Ne pea ampÿa mã
 cupê amehcuhhê, mehkên mã hàr ne cute me amji pupun xà kêanre to
 me amji pupun cupate, ne me ajpên mã:

— Akÿ, akÿ, Papirôn jô krī catia carôt tÿjti ata, ca ajte amcro pyxit peaj
 kam akên mã axàr ne gamre pyrentu — hajÿr.

11 Ne pjê cunea kam me cupê ihpore na ampo to hàhpan atajê hanea ne
 hapête ame amrã. Ampo na? Jÿ wÿr quê ha jũm hipêr me cumã ihpore
 na cute me cumã ampo to hàhpan xà atajê nō japrô. 12-13 Jÿ wÿr quê
 ha hipêr jũm mecupê ampo pejti itajê nō japrô he: Wakÿre prà tepti pê
 ôr me, wakÿre prà jakare me, kên pejti na hĩ ahwÿ atajê me, caxàt xê
 pejti me, cupêhkà intepti me, cupêhkà hêrhêtre me, carà cahàcre hô te
 cupêhkà intepti ata me, pĩ na tee amehcukij ata me, ampo jĩpàr jakare

impejti atajê me, pĩ na hĩ ahwỳ ata me, wakỳre cahhyr na impejti ata me, wakỳre me, kĕn jaka pejre me, ampo pĩ kà te me hũrkwa cuxwa xà me, ampo pĩhhôc pê ràm cuxwa pyràcti me, ampo cacô cuxwati atajê me, pĩxô cacô xỳre me, ampo to impê xà me, kwỳr xôm me, arỳjhy me, pryti me, carà cahàcre hōhti me, cawrô me, cawrô jō kujti me, me pahcaxwỳn me, me hũmre me, me cahāj te cama cumā hāpĕn xà itajê nō to ihpore na me ahpa. ¹⁴⁻¹⁵Ne me cupê ampo to me hāhpan catêjê atajê, ampỳa mǎ amehcuhhê, mehkĕn mǎ me hār xà ata cupate, ne ame carār ne me amrā, ne cama krĩ ata mǎ me:

— Por pê ca ampo pejti na ajco mehprām atajê jamre, ne hamre, ca gōtpê apictor! Ne hanea ne gakrāj itajê cunea to apictor! Pom kĕn prāti itajême, wakỳre prāti pê ca ajco to amji jakrô atajê me. Ne hamre, jũ wỳr ca hipĕr me cumā acato. Pê wa ajco ampo to me ijāhpan kam, wa rỳ ame ijakrāj. ¹⁶Akỳ, akỳ, por krĩ cati ata! Ate cupĕhkà increcrti to akà ata, cupĕhkà tepti me irārāti ata, me hakrô xà cunea prāti pejti atajê me. ¹⁷Ajte ana amcro pyxit peaj mǎ ajte ihcunea na gamre, me gakrāj mea mǎ! — hane. Mǎ pàr kre jō pahhi catêjê cunea me, kam me ipa itajê cunea me, cōxwa kamcute amji to me ipijapar xà caxuw kam me hāpĕn catêjê me, ampỳare mǎ ajte cupê me xa. ¹⁸Ne cute mehkrĩ kũm jàpir to mōr na me hōmpun, ne ame carār to:

— Wa rỳ jũ caxuw ite krĩ jakrājti nō te hajỳr pupun nare — hajỳr.

¹⁹Ne pea me cumā amji kĩn nare na cute me amji jarĕn xà na, cute meamji krā jipro, pjê jacrô to, ne amencwỳr to:

— Akỳ, akỳ, krĩ cati ata! Gakrāj te ri, por cōxwa kam mehcuea mǎ pàr kre atajê cunea to hakrāj par. Ne ajte ahna ahtũm nare mǎca ajte ihcunea na apictor, ne amcro pyxit kam ihcunea nagamre! — hajỳr. ²⁰Hōhō, ite impar ne hōmpun to hajỳr. Na wa ite ijarkwa to:

— Cōjkwa kam me acunea ame gakry! Krĩ ata jamre pyrĕn, ca ame gakry! Meapê Pahpām na mekwỳ me, me apê Pahpām mǎ me cumā acakôc catêjê me, ca Pahpām jarkwa kôt me apa catêjê me, ca ame gakry! Ampo na? Nee mǎ ampo na nare, pom pê krĩ ita pê ame ato kĕanre itajêa to ri me Pahpām tehahpan xà na apu to kĕan to kĕanre — hajỳr.

²¹Mǎ pea Pahpām mǎ memprar catêjê nō, carôt tỳjti ata te kĕn catia nō ata jarĩ ne cōxwa kam to hũcapĕr, ne ihkôt me cumā harĕn to:

— Hōhō, quĕ ha me apê Papirōn jō krĩ kam me akrĩcatêjê mencryac kam me to hũcapĕr to mehanea, pom quĕ ite kĕn to ijũcapĕr he, quĕ ha jũ caxuw hipĕr me apupun nare. ²²Ne nee jũ caxuw akam, cute me wakỳre japàre cakôr catêjê nō jōkre kam me hapac nare, ne nee akam, cute me pohhê cakôr catêjê nō jākôrjōkre kam me hapac nare, ne nee akam hipĕr me hākôr catêjê nō jōkre kam me hapac nare. Ne quĕ ha jũ caxuw cute me ampo cunea to hāpĕn jahkre pej atajĕnō, akam hāpĕn xà nō mǎ cator nare. Ne nee me akam arỳjhy huc nō jàhkrihkrit nō kam me hapac

nare. ²³Quê ha jũ caxuw hipêr akam hàhcujro xà nõ, jàhcujro nõ na me hõmpun nare. Ne nee akam, por me hũmre me pyjê nõ jikwa tuw to me amji mãmehcakôc atajê nõ jõkre kam me hapac nare. Ne akam ampo to me hàhpan catêjê atajê, pjê cunea kam mehkwy jirôa pê me carôt tỳj. Ne me gũxyto ajco pjê cunea kam mehcunea mã ahêj to apa.

²⁴— Papirôn jõ krĩ catia to cati ata, ca akên xà catia mã axàr. Ampo na? Cute akam me Pahpãm na mehkwy caprô me, Pahpãm jarkwa to mehcakôc catêjêcaprô me, Pahpãm kôt me amji ton to me ipa catêjê caprô mã me cator. Por ate me hipej atajê caprô mã ri, cute me cumã cator. Ỳhỹ, ne hanea ne, pom cute pjêcunea kam amehcuran itajê caprô mea mã cute me cumã cator, cwỳrjapê ri cute ihcunea to ajkam mehpỳm — hajỳr.

Côjkwa kam Pahpãm na mehkwy amji mã me to amnã

19 ¹Ita jirô pê mã, wa ite côjkwa kam me hàhtôa jõkre par, mã me harkwaxa, ne cute amji mã me hũjarên to:

— Cu ha Pahpãm catihti mempejti na me harê! Ne cupêa ri quêt me pahcunea kênpe me pahto hapôj catê! Ne mehcunea mã, pjê cunea kam, impejti na me hahkre pej! Ne quêt mehcunea jirôa pê carôt tỳaj to carôt tỳj! ²Ne cute me hahkre pej xàa na ri mehcukij ne meto ajcokjê, cajrerti cuhtacti to hãn nemehcukij, nee mã ihtỳj ame to ipicokjêr nare. Ne cutea ri krĩ ata pê cahãj xyre inxỳ xà kêanre ata cwỳrjapê ihkên xà kêanre ata mã mên, pjê cunea kam inxỳ xà kêanre atajê cwỳrjapê. Ne hanea ne Pahpãm te apu to kêanre, cute cumã me hàpên catêjê curan jahpan xà na.

³— Cu ha Pahpãm pejti catihti na me harê. Ampo na? Quê ha krĩ pôc ita kũm ihtỳj hõtpê hàpir to ipa, ne nee hamre nare! — hajỳr. ⁴Mã pahhi catêjê te me winticwat atajê me, cute me cwat atajê me, Pahpãmhyr xà kam jỹ ata cuna mãmehkôn krã na me hỹr, ne cute me amji mã me hũpa ne to cati prãmte, cumã harkwa to:

— Ampeaj kam ri! Apê me Ijõ Inxũ Cati! — hajỳr.

Jeju pê Caràcahàcre Kra ata jikwa tuw xà

⁵Mã pea Pahpãm krĩ xà ata pĩn jũm ita jarkwa cator, ne cute hũjarên to:

— Me pajõ Inxũ Cati pê Pahpãm catihti na ca me harê! Me apê cumã me gápên catêjêcunea, me hũmre kà me, mehkryjre me, por ca meacunea amji mã me hũpahti atajê, ca ha catihti na me harê! — hajỳr. ⁶Ne pea ite me hàhtôa jarkwa xãmte pê ihhêj rũm cõhxocti jàhkrihkrit me, pahhàjê jàhkrihkrit pyrãcti ata kam ijapac, mã cute me hũjarên to:

— Pahpãm mã ca me catihti to me acakôc. Ampo na? Me pajõ Inxũ Cati pê Pahpãmpe Pahhiti ita ri mehcunea jirôa pê carôt tỳj, ata ri pjê cunea to ihhimpej. ⁷Ne ampeaj kam me pajakry ita mã amji kĩn, ne me pajakrya to me pajakry, cwỳrjapê wa catihti na amji mã me harê. Ampo na? He ramã CaràcahàcreKra jikwa tuw xà jõ amji kĩa kam ri hàhhuc,

ne hõamcroa mã he. Ne hĩxi me hikwa xà caxuw cute me ajpĕn par, ne cute amji cŭmpej xàa kamri ramã hàhhuc. ⁸Ne ramã cute ihkà jakati, tŭm nare, pràti ata pyr, cute to ihkà xà caxuw, ne ihkà jakati impejti ata pĕ Jeju na mehkwŷ te ampo pejti ton to meipa xà — hajŷr.

⁹Jirô pĕ mã ri cute imã hŷjarĕn to:

— Ita na ca ihhõc he: “Por Caràcahàcre Kra pĕ Jejujikwa tuw xà jŏ amji kĭn wŷr cute me hatoratajĕ, me hakrya to me hakry”. Nãmri itajĕ pĕ ri quĕt caxwãm catia mã Pahpãm cakõc xà impejti atajĕ, na ca ha ahna ihhõc — hajŷr. ¹⁰Wa pea Pahpãm jarkwa na imprar catĕ cuna mã ikõn krã na ijŷr, ite amji mã hŷpa ne to cati prãmtĕ, mã cute amji tĕte imã harkwa to:

— Apu ito hajŷr nare, ipĕ me akjĕjĕ kwŷa nõ wa. Ne hanea ne ipĕ, por Jeju jarkwa to me amji mã mehhimpej to me ipa atajĕ kwŷ nõa wa. Pom me kamJeju jarkwa itajĕa ri me to ihhimpej to ipa. Na ca ha quĕt apu Pahpãm pit kĭn — hajŷr.

Quĕ ha Jeju ajpĕn tĕ ne curĕ xwŷn catĕjĕ to hamre

Ruc 21.25-28; 2 Texarõn 1.6-10

¹¹Jirô pĕ mã, wa ite cõjkwa te amji jihĕ mĕn na hõmpun, mã pea cawrô jakati ita cator. Mã kam hŷr catĕ ata japrŷ te CaxwãmCatia Mã Cute Amji Jarkwa Par Catĕ. Ne catyt kam hãn ne ajpu, ne cute ampo na me hõmpun xà atajĕa kõt hãn nemehcukij ne me to ipicokjĕr to ihcuhhĕ. ¹²Ne into pĕ ihhĕj rŭm cuhy põc hire ata pyrãac, ne ampeaj kam ihkrã kam cumã ihkrãhkà jãhtô. Ne por haprŷ na kam ihhõc ata ri, nee jŷmmã irãn xà na hahkre pej nare, ne cumãa ri hahkre pej. ¹³Ne ampeaj kam ihkãhti ata na me caprô. Mã cute amji mã haprŷ to: “Pahpãm Jarkwa” hajŷr. ¹⁴Mã ma cõjkwa jõkrãhtare te ihkà jakati impejti me, hõ cawrô jakatiata to me hŷnãr. ¹⁵Ne pĕ harkwa kam wapo xwahhihti ata xa, ne ajco hapõj, ne toa pĕ ajcoampo kra me, krĩxãre cunea to kĕanre to ipa, ne ajco me tohĵĕ! Ne por wakŷrete pĩ cajrer pahtŷjti ata to, quĕ ha me to ihhimpej to mõ. Ne pea Pahpãm carõt tŷjti ata te incryc to cuprõn xà pĕ kwŷr jatĕn xà ata kam, quĕha cute mehcuran atajĕ cunea caprô jaxwŷ. Por me caprô pĕ ampo cacõxŷre intepti ata, quĕ ha kam haxwŷ ne cormã hatĕ. ¹⁶Ne pĕ ihkãhti me, ihkjĕ kam ihhõc ata harĕn to: “Pahhi Catĕjĕ Jõ Pahhiti, Ne Me To Ihhimpej Catĕjĕ To Ihhimpej Catĕ”.

Pryjara te mehtyc kur atajĕ mehtyc jãhtõa pyrĕn hakry

¹⁷Ne hanea ne, pom Pahpãm jarkwa na imprar catĕ pyt kam xa ata te cõjkwa kam xõnti me, ampo jara cunea mã kŷj cati pĕa mã hàkjĕr to:

— Ajpĕn me cuprõ! Pahpãm te me amã me gõ jõr xà atajĕ wŷr! ¹⁸Ajpĕn ame pra, ne ame cupĕ pahhi catĕjĕ jĩ ku, ne ame krãhtare jõ pahhi jĩ ku, ne ame krãhtare jĩ ku, ne ame cawrô me, kam ihkrĩ catĕjĕjĩ ku, ne ame

hũmre me, cama ame hàpên catêjê jĩ ku, hõ pahhi jĩ mea mã, ne ame hakràj jĩ ku, ne ame cupê hamreare atajê jĩ ku — hajj̄r.

Jeju te me pahcurê xwÿn pê ampo kên jàprê pyrác ata tohjê

¹⁹Jirô pê mã, wa ite ampo kênti ata pupun, ne hanea ne pjê jô pahhi catêjê pupun, mã cute me hõ krãhtare to me cuprôn, ne me to xa, cute, porcawrô jakati kam jÿ ata me hõ krãhtare cuna mã me hàprê prãmte. ²⁰Ne pea cute me ampo kênti ita kam ihtêm, ne mehpro, ne hanea ne cute ampo cunea to me cumã ihhêj xi to ipa catê kêanre ata pro, ne ajwar cute me haxàr. Nãmri taa mã pê ajco, por amji mã me hũpa, mã cute me kuctÿj kam haprÿ nôr atajê mã ihhêj xi toipa. Cwÿrjapê ri cute ampo kênti ata me, cute harkwa na me cumãihhêj xi catê ata me, ajwar cuhy pôc te amji to kwa, ne kam kên te me to caxàr xà ata kam, cute mehtiar na me to hũcapêr. Mã curia mehkrĩ rohnÿtti mã. ²¹Ne por cawrô jakati kam jÿ ata jarkwa pĩn, wapo xwahhihti hapôj ata te ampo kênti jô krãhtare cunea jipej. Mã pea cute me ampo jara cuneamã me hàkjêr itajê te ame hĩ to harte partu.

Pê Xatanaj huwapre ita na ahna caku mir

Ipipên Xà 5.9-10

20 ¹Wa pea ite côjkwa pĩn Pahpãm jarkwa na memprar catê nō ata pupun, mã ajpên ahpar mã tẽ. Ne hũhkra kam cumã kre jatôhhy nare jihêrên xà ata, me wakÿti pytiti te mehcajpre xà ata to ajpên ihtêm na, ite hõmpun. ²Mã pea iwrÿc, pê cute cagãti ata pro, ne por cagãti ata pê Xatanaj pê mam cati mã mepahcunea curê xwÿn ata. Mã cute ihpro, ne pea huwapre, quê ha huwapre ita na amji to caku to mir. ³Ne cute kre jatôhhy nare ata kam mên. Ne pea hihê xà to ihpro ne ahnato hihê. Cute cator ne ampo krìxàre kwÿ cunea mã apu ihhêj to ipa to caku to mir ita mã hahêr cupate ri, cute haxàr. Ne quê ha ihcuhhê, quê haxa caku to mir ita hamre, jirô pê mã, quê ha cormã me cumã hikran to incire ne.

Quê ha Jeju pjê kam mehkrĩ atajê cunea to ihhimpej to caku to mir

⁴Wa ite pahhi krĩ xà atajê pupun, ne kam mehkrĩ catêjê pupun, mã kam mehkrĩ. Ne por mehkrĩ atajêa te ri mehcuikij catêjê na amji caxuwme hũpar. Ne hanea ne ite Jeju to cute amji mã mehhimpej to me ipa, ne Pahpãm jarkwa to mehcajco to me ipa, mã cute incwÿrjapê mehkrã Jakep catêjêatajê caxwÿn pupun. Ne por ite me hõmpun atajê, pê nee ame ampo kênti ata me ihkreka ata amji mã me hũpa nare, mã nee mehkuuctÿj kam me haprÿ nare, ne nee me hũhkrakam haprÿ nare. Cwÿrjapê ri hacpÿa mã amehit̄r, ne pea Jeju cahê na cutemehhimpej to caku to mir ita jicu xà mã me hahêr. ⁵Ne mehtyc atajê cahhur, nee hacpÿ mã amehit̄r nare, quê ha xa caku te mir atajê hamre, jirô pê quê

ha cormã mehcukijxà caxuw hacpỹ mã amehtĩr. ⁶Ne pom mam mehtĩr xà kam amehtĩr atajê, me hakrya to ame hakry. Ampo na? Quê ha Pahpãm quêt me to kênre nare, quê ha hipêr amehtycnare. Ne quêt me cupê Pahpãm tehcajpar catêjê, ne me cupê Jeju cahê namehhimpej catêjê, ne mehhimpej ita to me caku te mir ita jicu xà mã me to hahê.

Quê ha Xatanaj mã me hê pôn cri

⁷Ne caku te mir ata jamre jirô pê mã, quê ha me Xatanaj cator, ihcuhhê xà pê kre jatôhhy ata pê. ⁸Quê ha ma Coc jô pjê me, Macoc jô pjê kam, krĩ cunea apu ihcuhhê atajê kôthapôj to ipa, ne mehcunea mã ihhêj to ipa. Ne cute me cumã ihhêj ita toquê ha me hàhtôa ne me haprô, ne me to cuprô. Quê ha me hàhtô pê ihhêj rüm pjênxôm carôt jàhtô, me hàprê xà caxuw.

⁹Ne ma mehcakũm to me ipa. Ne cute me Pahpãm na mehkwy jô krĩ pê cumã Krĩpinkrên kĩnti ata krã, cute me hipej prãnte. Mã cõjkwa pĩn cuhy cator, ne cute mehcunea jipej tu.

Cuhy catia mã cute Xatanaj mên xà

¹⁰Ne pea cute me Xatanaj pro, ne cuhy te amji to kwa ata kam me to hũcapêr, por pê ramã kam me ampo kênti me harkwa na me cumã ihhêj catêto me awcapê ata kam. Ne hamre, quê ha caxwa me amcro cunea kam, jũ caxuw me cumã mehkàj xà atajê me cumã amji to pec nare, quê ha mehkàj xà itame cumã hà rohnýtti mã.

Quê ha Pahpãm mempej japê mehkôpĩ Jowãw 5.25-29

¹¹Ne wa ite Pahhi krĩ xà jakati ata pupun, ne hanea ne kam hỹr catê ata pupun, mã kam jỹ. Mã xà cuna mã pjê me cõjkwa xa, wa ite hõmpun, mãkrãa, jũ kam hũpate ajwar ipictor. Ne nee jũm te hipêr hõmpun nare. ¹²⁻¹³Ne hanea ne ite me hãmkrã me, me hãmkrãnare catêjê tyc pupun. Mã cõxwa te me ipĩr catêjê atajê jĩ cunea curia hanea ne me xa. Mã hanea ne pjê cunea kam cute ame harêr atajê jĩ, curi mexa. Mã pea me hỹrmã me carô japôj par, ne hacpỹa mã cute ame hĩ tỹj par, mã me xa. Ne Pahhi ihkrĩ xà kam jỹ ata cuna mã mehcunea me xa. Mã peacute ihkàhhôc atajê pahe, ne hipêr ihnô pahe, por kam me haprỹ hikwa atajê tohacpỹa mã ihtĩr xà caxuw. Ne me cumã ampii, ne ramã ihkàhhôc atajê kam ihhôc ata kôt cute ame ampo tonxà atajêa na, ahpyãre na cute mehcukij par.

Quê ha cuhy catia mã mehkên rê

¹⁴⁻¹⁵Ne por hacpỹa mã mehtĩr xà jô kàhhôc kam me haprỹ nare atajê to ri, cute cuhy te amji to kwa kam, cute me to caxàr xà ata kam, mehĩ me, me carô meamã, cute me to hũcapêr. Ne mehtyc catêjê jô pahhi me, mehkĩrĩ xà mea mã cuhy te amji to kwa kam, cute me to hũcapêr. Ne pom

cuhy te amji to kwaata pê ri mehtyc jirô pê hipêr mehcuran xà. Ne ikam mare mã cute me to hajÿr, wa ite me ahna hõmpun.

Quê ha cõjkwa tuw me pjê tuw kam ampo pej pit

2 Petrô 3.8-13

21 ¹Ne pea ite cõjkwa tuw me, pjê tuw te amji to ipipê na hõmpun. Ne mamcõjkwa ata me, pjê ata me, cõxwa mea mã hamre ne hamre tu. ²Wa pea ite Krîpinkrên pejti tuwti ata pupun, mã Pahpãm pîn ahpar mãmõ, ata pê ihhêj rûm jûm cuprÿ te impjên me hikwa xàcaxuw, me ajpên cajpar to me mõi. ³Wa pea ite ihkrî xà ata pîn jûm jõkre tÿjti jûjarên xà te hajÿrata na impar, mã cute hûjarên to:

— Ita caxuw me hũmre cahi na Pahpãm krî xà. Ne Pahpãm ita quê ha me cahi na ihkrî, ne taaamji to me Hũm Cati. Quê ha hanea ne amji to mehkwy neamji cahi na amehkrî, quê ha Pahpãm ata amji to me hõ Pahpãm. ⁴Ne taa mehcunea mã mehkuc na mento cacõ incrà. Quê ha pea hipêr jû caxuw mehtyc xà nare, ne nee me cumã amji kîn nare nare, ne nee hipêramencwÿr xà hamreare, ne nee hipêr amehkàj xànõ me cumã hamreare. Ampo na? Maramã mam ampo wej itajê cunea ma tẽ, ne ramã ampo tuw cator xàa kam — hajÿr.

⁵Ne por hÿr xà kam jÿ ata te ri me cumã harkwa to:

— Wa ha ita caxuw ampo tuw ton partu — hajÿr. Ne cute imã harkwa to:

— Atÿj amji mã ijarkwa itajê to hane, nãmri wa ha itÿj ihcunea ton pa, na ca ha ahna ihhõc partu.

⁶— Ne ramã ampo atajê cunea te amji jipêj partu. Ne ipê pjê kat me hihõt jõ Pahhiti, ne ipê cumã kat kam ampo cunea jõ Pahhiti, ne ipê hicu xàakam ampo itajê cunea jõ Pahhiti. Ne por jûm mã kõi ata, wa ha cama cumã mehtir rohnÿtti mã xà jõ cõ ata kwÿ, quê ha to ikõ, ne nee hipêrcumã kõi nare, ne nee hipêr ihtyc xà nare, ne nee quê ha hahpan xà na imã hàmjõr nare. ⁷Ne por quê ha me ampo kên cunea tohjê atajê, to wa ha amji kra, ne pa amji to me Hũm Cati. ⁸Ne por amji mã ame ampo cupa to me ipa atajê me, mehkwy ihkên mã meirên to me ipa atajê me, ampeaj kam amji mã me ito Pahpãm nare atajê me, mehkwy curan to me ipa atajê me, ahti na me pyjê caxun atajê me, me hũxy xi catêjê atajê me, cute amji mã ame hũm cahàc carõ kên kîn to ipacatêjê me, mehhêj xi catêjê cunea, krî xà ri cuhy te amji to kwa, ne kam kên te me to caxàr xà cacrohti ata, quê ha hipêr amehcura — hajÿr.

Pahpãm na mehkwy impej pê Krîpinkrên tuw pejti pyrãc

Carati 4.26

⁹Mã pea Pahpãm mã memprar catêjê te xet atajê nõ te hapua na cratti pê Pahpãm cryc jaxwÿr ata ajpên iwÿr mõi, ne cute imã hûjarên to:

— Ajpên ikôt mō, wa amã Caràcahàcre Kra me hīxi jikwa tuw xà jahkre, ca hōmpu — hajÿr.

¹⁰Mã Pahpãm Carō Pejti ata te imã amji jōr, mã macumã imprar catê te ijaarōr ne ito mō, ne pea cutehahkà jakōtti nō kàa to ihkà ata naixãm. Ne cute imã Krīpinkrên pejti tuwta ata jahkre, wa ite hōmpun, mã Pahpãm pīn cōjkwapīn ajpên iwryc to mō. ¹¹Ne ampeaj kam Pahpãm pejti jàhcujrohti ata te to ihpràa to, to ihprà. Pê krī ita prà pê ihhêj rŭm kēn prà tetetti ata. ¹²Ne ampeaj kam intête kwÿc ata ihkà, ne harkwa jàhtô na cute tōxi, nehamãr xà na Pahpãm mã memprar catêjê te tōxi ne ahna amehcuhhê. Ne harkwa atajê kam Ixaher kra te tōxi japry na ihhōc. ¹³Ne pê harkwa itajê amji jīkjê na ahpÿanre na incrê pa, ne pyt japōjxà rŭm incrê, ne hanea ne pyt cjêj xà rŭm incrê, ne hanea ne ita rŭmitajê incrê, ne hanea ne hīkjê rŭm itajê incrê. ¹⁴Ne krī tēte kwÿc ata pê kēnte tōxi atajê jipy me to kwÿc, ne kamCaràcahàcre Kra jarkwa na memprar catêjê japry te tōxi ne hikwa.

Krīpinkrên tuw ata kam ihtÿj me hàhtôa ne mehkrī xà

¹⁵Ne pom pê Pahpãm mã imprar catê imã ihcakôc ata jŭhkra kam pê cumã wakÿre pràti pê ôr te pīhhêre ata. Pê cupy ne to xa, cute to krī me, intête kwÿc me, harkwa to ipipên xà caxuw. ¹⁶Pê krī ata hakep pejti itajêa apu ihkrã, ne ajpên pit. Ihcahpa na ihpo me, ihcajpuw ihpo me, hīpê na ihpo me, kàj mã ihpo me, ihcunea ajpên pit, nenee ihnō te ajpên jīkjê nare. Mã pea cute hō pī cajrer ata to to ipipên, mã ihpo te quirom te mir pijakrut ne ihkôt xěj pijakrut. ¹⁷Ne hanea ne cute ipu na kwÿc ata tic to ipipên. Mã ihtic na pajara capô te xīncwēnta.

Krīpinkrên tuw ata peaj to impej

¹⁸Ne krī pu na kwÿcata, pê kēn pràti japôc mã apê tetetti ata pitintête kwÿc. Ne krī ata, pê ôr te wakÿre prà tepti ata to pit mã me krīata xãm, ne pê ihprà pê ihhêj rŭm irīt xà prà. ¹⁹Ne krī mã cuhhê xàkat ata pê ahpÿanre na ajpên jipy, kēn prà pihhopejti itajê to pit mã me to he. Ne mam ita pê ihprà jakati, ne incwÿrpê ita pê ihprà ihkukŭmti, ne ihnō ita pê ihprà irãrã ahhoti, ne ihnō ita pê ihprà ihkukŭm tycti. ²⁰Ne ihnō ita pê ihprà ihtatapti, ne ihnō ita pê ihprà intep rãrãti, ne ihnō ita pê ihprà ihkukŭm tatapti, ne ihnō ita pê ihprãihkukŭm jiprone, ne ihnō ita pê ihprã ihkukŭm tatapre, ne ihnō ita pê ihprã ihkukŭm jakati, ne ihnō ita pê ihprã ihkukŭm jiwryincoti, ne ihnō ita pê ihprã ihkukŭm jiwry jiproti. ²¹Ne pê kēn prà jaka jajoti te tōxi atajê kam, ahpÿanre na harkwa partu. Ne krī jō krī cape ata, pêwakÿre pràti pê ôr japôc mã apēhti pê wit pyrãc ata to pit mã mehkrī cape ata to.

²²Ne pê wa tee krī ata kam Pahpãm to me amji kam me hapac xà jŭrkwa japê, ne nee ihnō pupun nare. Ampo na? Me pajō Pahhiti pê

Pahpām mehirôa pê carôt tỳj ata me, ikra pê Caràcahàcre Kra ata pê ri krĩata cunea kam me Pahpām to amji kam hapac xà.

Pahpām jàhcujrohti te Krĩpinkrĕn tuw kujro

²³Mã nee krĩ ata amji kujro xà caxuw pyt me putwry na prām nare. Ampo na? Nee mã ampo na nare, Pahpām pejti jàhcujro xà ata ri ihcujro, neCaràcahàcre Kra ata pê ri hanea ne hàhcujro xà. ²⁴Quê ha pjê kam mehcunea hàhcujrohti ata kam ame ipa. Quê ha pea pjê kam me cupê pahhi catêjê cunea hỹrmã me pra, me hakràj me, me hàmkrà catêjê me. ²⁵Ne krĩ jŏ harkwa ata, quê ha hihê mĕnata na ihcuhhê. Ampo na? He curi caxwa xà nare na, na quê ha nee jũ caxuw me to hihê nare. ²⁶Quê ha krĩxàre jàmkrã cati catêjê me, me hakràj cati catêjê me, ihtỳj krĩ ata wry me hakràj itajê cunea to me ipa.

Nee curi mehkĕn ton catêjê cjêj xà hamreare

²⁷Ne nee krĩ ata mã mehcunea incjêj xà nare. Ampo na? Por krĩ ata mã nee cute me amji kam hapac xà tũmti atajê incjêj xà nare. Ne hanea ne, por cute ame ampo ton xà kam me pahpahàmti atajê incjêj xà nare. Ne hanea ne, nee mehhêj xi catêjê incjêj xà nare. Ne por Caràcahàcre Kra jŏ kàhhôc kam hacpyã mã mehtĩr xà kam me hapry hikwa atajê ri ihtỳj mencjêj xà.

22 ¹Ne hanea ne cute imã mehtĩr rohnỳtti mã xà jŏ cŏ to ihkŏm xà ata jahkre, wa ite hŏmpun. Mã Pahpām me, ihkra pê Caràcahàcre Kra ihkrĩxàa pĩn ajpjê, ne ampeaj kam ihprã jiwry, pê ihhêj rũm kĕn prã jiwryhti ata, ne krĩ jŏ krĩ cape cajpuw ajpjê. ²Ne pĩxŏ pãr te cŏ jũjĕata, quê ha jũm hŏ nŏ krĕ, ne jũ caxuw ihtyc nare, na pê hapry pê Mehtĩr Rohnỳtti Mã Xà Jŏ Pĩxŏ Pãr. Ne ahpãanre na putwrypyxit kam ajco hŏ xen xà to hŏ. Ne caku pyxit kam hŏ xen xà to hŏ to tŏxi. Ne ihhŏ atajê pê hanea ne ihtỳj curi krĩxàre cahhĕxà na impej, ne ihtỳj me cumã ampej.

Cu ha pahtỳj Pahpām kuc ri me hŏmpu

³Ne krĩ ata kam, por Pahpām mã ampo kĕn kĩn nare atajê jamreare. Ne Pahpām krĩ xà ata ri, krĩ ata kam ihcuhhê. Mã mehkwy cunea pê cumã me hàpĕn catêjê atajê ihtỳj Pahpãmmã cute mehkĩnti na me amji jarĕ.

⁴Ne ihtỳj me Pahpām kuc pupu, ne cute me hŏmpun catêjê atajê cunea kuctỳj kam hapry pit. ⁵Ne hipĕr curi caxwa xà nare, ne nee cute me amji kujro xà na ame ampojàhcujro xà na me prām nare, ne nee ame pyt jàhcujro na me prām nare. Ampo na? Me pajŏ Pahhiti pê Pahpām pê ri mehcujro xà, ne quê ha me tame to ihhimpej to mehkĩr rohnỳtti mã.

Pom Jowãw te me cumã ihcakŏc itajê ampeaj kam ri

⁶Ne por Pahpām mã imprar catĕ apu imã ampo to ipipĕ to harĕn to mŏ ata te ri imã hũjarĕn to:

— Pom ite amã ampo cunea jarĕn itajĕ, atỳj kampa, nãmri ampeaj kam ri. Ampo na? Pahpãm pê me pajō Pahhiti, pê ajco harkwa to mehcahôc catĕjĕ mã Carō Pejti kujate, ata te ri awỳr ikujahĕc. Ite amã ampo te hajỳr xàitajĕ jarĕn, ne amã to ipipĕ, ca ate hõmpun prãmte ri, cute awỳr ikujahĕc — hajỳr. Mã pea Jeju te amji jarĕn to:

⁷— Pom ca Inxũ Cati jarkwa na ihkàhhôc kam me gapac pejti to me apa atajĕ, me gakrya ne. Ampo na? Wa ha amji jaxàr pyrentu — hajỳr.

⁸Ipĕ Jowãw, ne wa ite ampo itajĕ cunea impar, ne ihcunea pupun. Ne ite hõmpun ita jirô pê, wa apu Pahpãm mã imprar catĕ ata to catia ne imã ihkĩnprãmte hỳrmã tĕ, ne pea cuna mã ikõn krã na ijỳr, mã cute imã harkwa to:

⁹— Apu ito hajỳr nare. He wa nee girôa pê icati nare, nãmri ipĕ anõa wa, ne hanea ne ipĕ me akjĕjĕkwỳa nō wa, ne ipĕ, por wa me ihkàhhôc ita jarkwa kampa atajĕ nōa wa. Ne quĕt Pahpãm to ca me catia ne me amã ihkĩn.

Cu ha pahte amji kam me pajapac xà pejti to me papa

¹⁰— Nee ca apu ihkàhhôc ita te ampo jarĕn xà itajĕ to apimxur nare, ne atỳj mehcunea kam mare mã harĕn to apa. Nãmri, pom ampo te hajỳr xà ita, quĕ ha nee ahna ahtũm ry nare, quĕ ha ihcunea cato. ¹¹Por mehkĕanre atajĕ, quĕ ha ihtỳj mehkĕn itajĕ kam me to incrà tu, ne por mehtũmti atajĕ, quĕ ha ihtỳj mehtũmti ita kam me toincrà tu. Ne mempejti atajĕ, quĕ ha ihtỳj mempej ita kam me to incrà. Ne por me Pahpãm cuna mã mempejti na me ipa atajĕ, quĕ ha ihtỳj Pahpãm cuna mã impejti ita kam me to incrà tu ne — hajỳr.

¹²Ne ite hipĕr Jeju kam ijapac, mã cute imã hũjarĕn to:

— Wa ha amji jaxàr pyrentu! Ne ajpĕn me hàmcwỳr xà atajĕ to tĕ, ahpỳanre na cute me imã hàpĕn xà ton atajĕ jahpan xà na. ¹³Ipĕ pjĕ kat jō Pahhiti, ne ipĕ hihôt jō Pahhiti. Ne ipĕ harĕ me, ihhō me, hō jō Pahhiti. Ne ipĕ ampo cunea kam to iprar catĕ, ne ampo cunea to hamrecatĕ.

¹⁴— Ne por cute ame Caràcahàcre Kra caprô pê icaprô ata kam, cuteamji mã mehkà cahhõn catĕjĕ, me hakrya to me hakry. Ampo na wa ha me cumã ijũjarĕn to hane he: “Gapacta ne atỳj Mehtĩr Rohnỳtti Mã Xà Jō Pĩxô ita ku, neatỳj hanea ne krĩ jō harkwa itajĕ na me acjĕj xà” hane.

¹⁵Ne por cute ame ampo kĕn kĩnti atajĕ ri, pō pê krĩ pu na ame ipa xà, quĕ nee jũm hàr nare, krĩ kam ame ipa atajĕ kĩnte. Ne me hũxy xicatĕjĕ te hajỳr, ne cute me ampo kam me pahpahàmti ton catĕjĕ me, cute mehcuran catĕjĕ me, cute ame pahpãm cahàc krekà kĩn catĕjĕ me, cute ameharkwa me, me hàpĕn xà to mehhĕj to me ipa catĕjĕ atajĕ cunea, quĕ hanee krĩ ata mã jũm hàr nare, ne pō pê ame ipa.

¹⁶— Ipĕ Jeju, wa ite imã imprar catĕ kujahĕc me amã, cute me apĕ me ikwỳ mã ijarkwa na me amã ampo itajĕ cunea jarĕn xà na. Ne ipĕ

pahhiTawi xwỳ tàmwxỳ nŏa wa. Ne pom mehcunea awcahti xà wỳr me caxêti prà tetetti pejti pupu ata jĩkjê na mã, mehcunea me ipupu ne ipej na mejjahkre pej — hajỳr.

¹⁷Pahpãm Carŏ Pejti me Jeju me hĩxi pê krĩ impejti ata te hàkjêr to:

— Ajpên me acjêj — hajỳr. Ne por cute me ita par catêjê, quê ha mehkwy mã harkwa to:

— Hacme, ne me acjêj! — hane. Ne me anŏ mã kŏr ata, ajpên mŏ ne cama cŏ ita kwỳ to ikŏ. Ne pom cŏ ita, quê ha jũm te to ihkŏm ataihtĩr rohnỳtti mã, ne nee jũ caxuw ihtyc nare.

Ihkàhhôc ita nee kam me to incri xà nare, ne nee kam me to cati xà nare

¹⁸Ipê Jowāw, pa wa ha caxwām catia mã ate Pahpãm jŏ kàhhôc ita kam me gapac catêjê mã ihcawpa. Nãmri quê ha ihkàhhôc ita kam harkwa itakaj na, hirŏa pê jũm te ampoto ipicamên na, quê ha Pahpãm hanea ne ihtỳj cumãihkàhhôc ita kam, cute ihkên na ihhŏc atajê to cumã ajcamê.

¹⁹Nãmri quê ha hanea ne jũm te Pahpãm jarkwa ita têtê, pŏ mã harkwa nŏ to hũcapêr na, quê ha hanea ne Pahpãm ma apu cupê hŏ pixŏ te me to ihtĩr rohnỳtti mã xà ata intê, ne nee cumã ihnŏ nare, ne hanea ne ma hŏ krĩ impejti ata têtê apu curê. Hŏ, por ramã ite ijŏ kàhhôc kam ahna ihhŏc atajê mã he.

²⁰Ne por catyt kam Jeju te ampo itajê cunea jarên ata te ri amji jarên to:

— Ampeaj kam wa ha hacpỹ ne amji jaxàr ne itêm pyrentu, he wa ha nee amji to ijàhtũm rynare, ne ajpên tẽ — hajỳr.

²¹Ne imã me Pajŏ Pahhiti pê Jeju te me acunea to impej na me ato prãm. Hamre. Appendix